

ጳውሎሲ ቆሮንቶሳ አሳስ ፃፊዳ ኮይሮ ኪታ ጋሳ ቆፋ

ጳውሎሲ ቆሮንቶሳ አሳስ ፃፊዳ ኮይሮ ኪታይ ፃፊቲዳይ፥ ጳውሎሲ ቆሮንቶሳን ኤሲዳ ምሳ ኬሳን አማኒያ አሳ ዴዎኒኔ አማኖ ቦላ ዴንዲዳ ሜቱዋስ ዛሮ ኢማናሳ። ሄ ምዴ ቆሮንቶሳ ካታማይ ቢታን ዴዲያ ዱማ ዱማ አሳይ ዴዲያ ጊሪኬ ካታማኔ አካያ ጊያ ሮሜ አውራጃስ ዋና ካታማ። ሄ ካታማይ ዛልዔን ኤሬቲዳ፥ ምጋን ሚኒዳ፥ ዱማ ዱማ ኢታ ዴዎን ዳልጊዳይሳኔ ሃይማኖቴ ዳሮቴሳን ኤሬቲዳይሳ።

ሃዋሬይ ሚንሲዲ አዳናው ኮዩዳይ፥ ሄ ምሳ ኬሳ ጊዶን ሜዴቲዳ ሻሆቴሳባ፥ ዱማ ዱማ ኢታ ዴዎባ፥ ላይማቴሳባ፥ ኤኮ ጌሎባ፥ ምሳ ኬሳ ምጋባ፥ ጌሻ አያና ኢሞታታባኔ ሃይቆፔ ዴንዶባ፥ ምንጌላይ ሃ አይሻታ ዋቲ ዛሪያኮ ሃዋሬይ ናጊዲ አዴስ።

ሲቆይ ያሳይ ባ አሳስ ኢሚዳ አዶ ኢሞታ ጊዴይሳ ሼምፖ ታማኔ ሄቫይ ቆንጨሴስ፤ ቃሲ ሼምፖ ታማኔ ሄቫይ ሃ ማፃፋን ዳሮ ኤሬቲዳ ኪሬሎ ጌቴቲዲ ኤሬቴስ።

1 ቆሮንቶሳ ኪታ አይፊ ቆፋታ

ጌሎ ቆፋ 1:1-9

አማኒያ አሳ ጊዶን ሜዴቲዳ ሻሄቴሳ 1:9-4:21

ላይማቴሴኔ ሶ አሳ ዴዎ ምጋ 5:1-7:40

አማኒያ አሳኔ አማኖና አሳ 8:1-11:1

ምሳ ኬሴኔ ጎይኖ ምጋ 11:2-14:40

ኪሪስቶሳ ዴንዱዋኔ አማኒያ አሳ ዴንዱዋ 15:1-58

ዩሁዳን ዴዲያ ሜቶቴቲዳ አማኒያ አሳስ ማዶ 16:1-4

ኩሻ ቆፋ 16:5-24

1 ያሳ ሼኒያን ዩሱስ ኪሪስቶሳ ሃዋሬ ጊዳናው ዔጌቲዳ ጳውሎሲኔ፥ ኑ ኢሻ ሶስቴኒሲ፥ 2 ቆሮንቶሳን ዴዲያ ያሳ ምሳ ኬሳስ፥ ዩሱስ ኪሪስቶሳን ጌዩዳይሳታሲኔ ጌሺ ጊዳና ሜላ ዔጌቲዳይሳታስ፤ ቃሲ ኤንታሲኔ ኑስ ጎዳ ጊዲያ ኑ ጎዳ ዩሱስ ኪሪስቶሳ ሱንሳ ኡባ ቤሳን ዔጊያ ኡባስ፤

3 ያሳይ፥ ኑ አዋይኔ ጎዳይ ዩሱስ ኪሪስቶሲ ሂንቴው አዶ ኬሃቴሳኔ ሳሮቴሳ ኢሞ።

ጳውሎሲ ሦሳ ጋላቴስ

⁴ ሦሳይ ከሪስቶስ ዮሱሳ ባጋራ ሂንቴው ኢሚዳ አዶ ከሃቴሳ ጊሾ ታኒ ኡባ ዎዴ ሦሳ ጋላታይስ። ⁵ ኢያን አዳኒኔ ኤራቴሳ ኡባን ሂንቴ ዱሬቴዴታ። ⁶ ታኒ ከሪስቶሳባ ማርካቴዳይሲ ቴማ ጊዴይሳ ሄሲ ቆንጨሴስ። ⁷ ሄሳ ጊሾ፣ ሂንቴ ኑ ጎዳ ዮሱስ ከሪስቶሳ ዮሳ ናጊሼ ዴዲሺን፣ አይ አያና ኢሞይካ ሂንቴው ፓጩና። ⁸ ኑ ጎዳ ዮሱስ ከሪስቶሲ ሲሚያ ዎዴ ሂንቴ ቦሬቶናይሳታ ጊዳና ሜላ ኢ ዉርሴሲ ጋካናው ሂንቴና ሚንሳና። ⁹ ባ ናዓ፣ ኑ ጎዳ ዮሱስ ከሪስቶሳራ ኢሲፌቴሳይ ዳና ሜላ ሂንቴና ዩጊዳ ሦሳይ አማኔቴዳይሳ።

ዎሳ ኬሳን ዴዲያ ሻሁዋ

¹⁰ ታ ኢሻቶ፣ ሂንቴ ጊዶን ሻኬቴሲ ዶናዳ ሂንቴ ኢሲ ዎዛናኒኔ ኢሲ ቆፋን ኢሶ ጊዲዲ፣ ዳና ሜላ ኑ ጎዳ ዮሱስ ከሪስቶሳ ሱንሳን ታ ሂንቴና ዎሳይስ። ¹¹ ታ ኢሻቶ፣ ቁሎዔ ሶ አሳይ ሂንቴ ጊዶን አሺ ዴዲይሳ ታው አዲዶሶና። ¹² ሂንቴፌ ኢሶቴ ኢሶቴ፣ «ታኒ ጳውሎሳሳ፤ ታኒ አጲሎሳሳ፤ ታኒ ጴጊሮሳሳ፤ ታኒ ከሪስቶሳሳ» ያጌታ። ¹³ ከሪስቶሲ ሻኬቴዴይ? ሂንቴ ጊሾ ማስቃሊያ ቦላ ካቁቴዳይ ጳውሎሴይ? ዎይኮ ሂንቴ ጳውሎሳ ሱንሳን ማጣቁቴዴይቴይ?

¹⁴ ታኒ ቃሪስጳሲኔ ጋዮሲ አቲን ሂንቴፌ አናካ ማጣቃቦና ጊሾ ሦሳ ጋላታይስ። ¹⁵ ሄሳ ጊሾ፣ አኒካ ሂንቴና ታ ሱንሳን ማጣቁቴዴይታ ጋናው ዳንዳዔና። [¹⁶ ቃሲ ኢስጊፋኖሴ ሶ አሳካ ታ ማጣቁዳይሳ አኬካይስ፣ ሺን ሃራ አና ማጣቁዳኮ ሃሳዪኬ።] ¹⁷ ከሪስቶሲ ታና ከቴዳይ ዎንጊላ አዳና ሚሳሳፌ አቲን ማጣቃና ሜላ ጊዴና። ከሪስቶሲ ማስቃሊያ ቦላ ሃይቁዳይሲ ሃዳ ጊዶና ሜላ ታኒ አሳ ጨንጫቴሳ ቃላን አዲኬ።

ከሪስቶሲ ሦሳ ዎልቃኔ ጨንጫቴሳ

¹⁸ ከሪስቶሲ ማስቃሊያ ቦላ ሃይቁዳይሳ አዲያ ቃላይ ዳይይሳታስ ኤያቴሲ፣ ሺን ኑስ አቴይሳታስ ሦሳ ዎልቃ። ¹⁹ ጌሻ ማግፋን፣

«ታኒ ጨንጫታ ጨንጫቴሳ ዳይሳና፤
አኬካንቾታ አኬካ ባሌሳና»
ያጌስ።

1:12 ሃ.አ 18:24 1:14 ሃ.አ 18:8፤ ሃ.አ 19:29፤ ሮሜ 16:23 1:16 1ቆሮ 16:15 1:19 ኢሳ 29:14

20 ያተን፥ ጨንጨ አውን ዴዒ? ሂጌ አስታማሬይ አውን ዴዒ? ዎይኮ ሃ ሳዓ ኤራንቾይ አውን ዴዒ? ያሳይ ሃ ሳዓ ጨንጨቴሳ ኤያቴሲ አሲቤኔ?

21 ሃ ሳዓ አሳይ ባንታ ጨንጨቴሳን ያሳ ኤሮና ሜላ ባ ጨንጨቴሳን ዲጊዲ፥ ኤያቴሳን ታይቤቴያ፥ ኑኒ አዲያ ቃላን አማኔይሳታ አሻናው ያሳ ሹኔ ጊዲስ። 22 አይሁዴቲ ማላታ ቤዓናው ኮዮሶና፤ ቃሲ ጊሪኬቲ ጨንጨቴሲ ኮዮሶና። 23 ሺን ኑኒ ማስቃሊያ ቦላ ካቁቲዳ ኪሪስቶሳ ሳባኮስ። ሄሲ አይሁዳታስ ዱቤ፤ ቃሲ ጊሪኬታስ ኤያቴሲ። 24 ሺን ያሳይ ዌጊዳይሳታስ፥ አይሁዴ ጊዲን፥ ጊሪኬ ጊዲን ኪሪስቶሲ ያሳ ዎልቃኔ ኢያ ጨንጨቴሳ። 25 ያሳ ኤያቴሳይ አሳ ጨንጨቴሳፌ አዴስ፤ ቃሲ ያሳ ዳቡራይ አሳ ሚኖቴሳፌ ሚኔስ።

26 ሂዛ፥ ታ ኢሻቶ፥ ያሳይ ሂንቴና ዌጊያ ዎዴ ሂንቴ አይ ሜላ አሴኮ ቆፒቴ። አሳ ቆፋን ሂንቴ ጊዶን ጨንጨቲ፥ ዎልቃማቲኔ ዶቃ ዛሬቲ ዶኮና። 27 ሺን ያሳይ ጨንጨታ ዩላያናው አላሜን ዴዒያ ኤያታ ዶሪስ፤ ቃሲ ሚኖታ ዩላያናው አላሜን ዴዒያ ዳቡራንቾታ ዶሪስ። 28 ያሳይ ሃ አላሚያን ጊታ ጌቴቲዳባ ዳይሳናው፥ ሃ ሳዓ ካዉሻባ፥ ካዴቲዳባኔ ፓሶናባ ዶሪስ። 29 አኒካ ያሳ ሲንሳን ጨቁቶና ሜላ ሄሳ አሲስ። 30 ሺን ያሳይ ሂንቴው ኪሪስቶስ ዩሱሳራ ኢሲፌቴሲ ዳና ሜላ አሲስ። ኢ ኑስ ያሳፌ ጨንጨቴሲ፥ ጊሎቴሲ፥ ጌሻቴሲኔ አቶቴሲ ጊዲስ። 31 ሄሳ ጊሾ፥ ጌሻ ማፃፋን፥ «ጨቁቲያ አኒካ ጎዳን ጨቆ» ያጌስ።

2

ኪሪስቶሳ ካቁቴሳ

1 ታ ኢሻቶ፥ ታኒ ኮይሮ ያሳ ቃላ ሂንቴው አዳሼ ዩዳ ዎዴ ዶና ቢላቴሳኒኔ ጨንጨቴሳን ያቢኬ። 2 ታኒ ሂንቴራ ዴዒያ ዎዴ ማስቃሊያ ቦላ ካቁቲዳ ዩሱስ ኪሪስቶሳጌ አቲን ሃራባ ኤራናው ኮዩኬ ጋዳ ታ ቆፋ ቃቻስ። 3 ታ ሂንቴራ ዴዒያ ዎዴ ዳቡራን፥ ያሻኒኔ ዳሮ ኮኮርሳን ዴዓስ። 4 ታ ኪታይኔ ታ ቲሚርቴይ ዶና ቢላቴሳኒኔ ጨንጨቴሳን ጊዶናሺን ጌሻ አያና ዎልቃ ቆንጨሴሳና። 5 ሄሲካ፥ ሂንቴ አማኖይ ያሳ ዎልቃናጌ አቲን አሳ ጨንጨቴሳን ዜምፖና ሜላሳ።

ያሳ ጨንጨቴሳ

6 አያና ዴዎን ዲጨዳይሳታስ ኑኒ ጨንጨቴሳ ቃላን አዶስ። ሺን ሄ ጨንጨቴሳይ፥ ሃ ሳዓ ጨንጨቴሳ ዎይኮ ዳያናው

ዴዲያ ሃ ሳዓ ሃሬይሳታ ጨንጫቴሳ ጊዴና። 7 ሺን ኑኒ ኦዲያ ጨንጨጭቴሳይ፥ ዳሮ ዎዴፕ ሲንጴ ያሳይ ኑ ቦንቹዋስ ጊጊሲዳይሳኔ ጌሚዲ ዴዲያ ፀራ ጨንጫቴሳ። 8 ሃ ሳዓ ሃሬይሳታፕ ኦኒካ ሃ ጨንጫቴሳ ኤሪቤና። ኤንቲ ኤሪዳባ ጊዲያኮ፥ ቦንቹ ጎዳ ማስቃሊያ ቦላ ካቆኮና። 9 ሺን ጌሻ ማፃፋን፥

«አይፌይ ቤዒቦናባ፥ ሃይሲ ሲዒቦናባ፥ ዎዛኒ ቆፐቦናባ፥

ያሳይ ባና ሲቆይሳታስ ጊጊሲስ» ያጌስ።

10 ያሳይ ባ ፀራ ባ አያና ባጋራ ኑስ ቆንጨሲስ። ጌሻ አያናይ ሃሪ አቶሺን ጌሚዳ ያሳ ፀራ ኡባ ፒልጌስ። 11 አሳን ዴዲያ አሳ አያናፕ አቲን አሳባ ኦኒካ ኤሬና። ሄሳዳካ፥ ያሳባ ያሳ አያናፕ አቲን ኦኒካ ኤሬና። 12 ያሳይ ኑስ ጮ ኢሚዳባ ኑ ኤራና ሜላ ያሳ አያና ኤኪዳፕ አቲን ሃ ሳዓ አያና ኤኪቦኮ።

13 ኑኒ አያናባ፥ አያና አሳታስ አሳ ጨንጫቴሳን ጊዴናሺን ያሳ አያናይ ኢሚያ ጨንጫቴሳን ታማርሶስ። 14 ሺን ጌሻ አያናይ ባይና አሲ ያሳ አያና ኢሞታታ ኤኬና። ሄሲ ኢያው ኤያቴሲ፤ ኡባይ ጌሻ አያናን ፒልጌቲያ ጊሾ ኢ ኤራናው ዳንዳዔና። 15 ሺን ጌሻ አያና ዴዲያ አሲ ኡባባ ፒልጌስ፥ ሺን ኢያ ኦኒካ ፒልጌና። 16 ጌሻ ማፃፋን፥

«ጎዳ ዎዛና ኤሬይ ኦኒ?»

ኢያ ዞራናው ዳንዳዔይ ኦኒ?»

ጌቴቲዲ ዓፌቲዳይሳ ሜላ። ሺን ኑስ ኪሪስቶሳ ዎዛኒ ዴዔስ።

3

ያሳ አሳንቾታ

1 ታ ኢሻቶ፥ ሂንቴ ኪሪስቶሳን ቡሮ ዮጋኔ አማኖና አሳሶ ዴዲያ ጊሾ ታኒ አያናባ ሂንቴው ኦዳናው ዳንዳዔቢኬ። 2 ሂንቴ ሚኖ ካሲ ማናው ዳንዳዒቦና ጊሾ ታኒ ሂንቴና ማሲ ፓሃስ፤ ሃዒካ ዳንዳዒቤኬታ። 3 ሃዒካ ሂንቴ አማኖና አሳዳ ዴዔታ። ሂንቴ ጊዶን ዴዲያ ቃናቴይኔ ፓላማይ ሂንቴ አማኖና አሳዳ ዴዔይሳ ኤሪቤኔ? ሂንቴ አማኖና አሳዳ ሃኔታ። 4 ሂንቴፌ ኢሶይ፥ «ታኒ ጳውሎሳሳ» ሃራይ ቃሲ፥ «ታኒ አጲሎሳሳ» ጊኮ፥ አማኖና አሳ ሜላ ጊዴኬቲ?

5 ያቲን፥ አጲሎሲ ኦኒ? ጳውሎሲ ኦኒ? ኑኒ ሂንቴና አማንሲዳ ያሳ አሳንቾታ። ያሳይ ኢሱዋስ ኢሱዋስ ኢሚዳ ኦሱዋ ሜላ አሲያ

አሳንቾታ ጊደኮናዩ? ⁶ ታ ቶካስ፤ አጲሎሲ ሃሴ ኡሺስ፤ ሺን ዲቺይ ያሳ። ⁷ ሄሳ ጊሾ፤ ዲቺዳ ያሳ። አቲን ቶኬይካ ሃሴ ኡሺይካ አይኮካ ጊደና። ⁸ ቶኬይካ ሃሴ ኡሺይ ዎሊ ሜላ፤ ሺን ኢሶይ ኢሶይ ባ አሱዋ ሜላ ያሳይ ኢሚያ ዎይቱዋ ኤካና። ⁹ ኑኒ ኢሲፌ ያሳስ አሊያ ኢያ አሳንቾታ ጊዲያ ጊሾ ሂንቴ ያሳ ሾቃ፤ ያሳ ኬሊ። ¹⁰ ያሳይ ታው ኢሚዳ አጾ ኬሃቴላ ሜላ ሂላንቾ አናዲዳ ባሱዋ ዩጋስ። ሃራ ኡራይ ኢያ ቦላ ኬዲስ። ሺን ኢያ ቦላ ኬዲያ አኒካ ዋቲዲ ኬዲያኮ፤ ባው ናጌቶ። ¹¹ ኢሲ ቶዋ ዩጌቲዳ ባሱዋ፤ ሃራ ባሶ ዩጋናው አኒካ ዳንዳዴና፤ ሄ ባሶይካ ዩሱስ ኪሪስቶሳ። ¹² ሺን ሃ ባሱዋ ቦላ አኒካ ዎርቃን ዎይኮ ቢራን ጊዲን፤ አልዎ ሹቻን ዎይኮ ሚላን ጊዲን፤ ማታን ዎይኮ ማቃን ኬዲኮ፤ ¹³ ኢሲ ኢሲ አሲ ሄ ባሱዋ ቦላ አይቢን ኬዲዳኮ ፐርዳ ጋላስ ታማን ፓጩቲዲ ቆንጫና። ¹⁴ አኒካ ሄ ባሱዋ ቦላ ኬዲዳ ኬላይ ታማን ፀጌቶና አቲኮ፤ ባ ዎይቱዋ ኤካና። ¹⁵ ሺን አዴ አሶይካ ታማን ፀጌቲኮ፤ ሄ ኡራስ ዎይቶይ ባዋ። ጊደሺን፤ ኢ ባ ሁዔን ታማ፤ ኬሲ ኤኪዳ አሳዳ አታና።

¹⁶ ሂንቴ ያሳ ኬሊ ጊዴይሳኔ ያሳ አያናይ ሂንቴናን ዴዔይሳ ኤሬኬቲ፤ ¹⁷ አኒካ ያሳ ኬሊ ላሊኮ፤ ያሳይካ ኢያ ላላና። ያሳ ኬላይ ጌሺ፤ ሄ ኬላይካ ሂንቴና።

¹⁸ አኒካ ባና ጨዋፎ። ሃ ሳዓ ጨንጫቴላን ባና ጨንጫ አሲዲ ኤኪያ አኒካ ያሳ ሲንላን ጨንጫ ጊዳናው ኤያ ጊዶ። ¹⁹ ሃ ሳዓ ጨንጫቴላይ ያሳ ሲንላን ኤያቴሊ። ጊሻ ማፃፍን፤ «ያሳይ ጨንጫታ ኤንታ ጌኔ ቆፋን አይኬስ» ያጌስ።

²⁰ ቃሲ፤ «ጨንጫታ ቆፋይ ማዶናባ ጊዴይሳ ጎዳይ ኤሬስ» ያጌስ።

²¹ ሄሳ ጊሾ፤ ኡባይ ሂንቴሳ ጊዲያ ጊሾ አኒካ አሳን ጨቆቶፎ።

²² ጳውሎሲ፤ አጲሎሲኔ ጳዊሮሲ፤ ሃ አላሜይ፤ ዴዎይ፤ ሃይቆይ፤ ሃዲ ዴዔይ፤ ሲንሳፌ ያናይሲ፤ ኡባይ ሂንቴሳ።

²³ ሂንቴ ኪሪስቶሳሳ፤ ኪሪስቶሲ ያሳሳ።

4

ኪሪስቶሳ ሃዋሬታ

¹ አሳይ ኑና ኪሪስቶሳ አይሌዳኔ ያሳ ፀራ ቆንጨሳናው ሃዳሪ ኢሜቲዳ አሳዳ አሊዲ ቆፖ። ² ሄ ሃዳራ ኤኪዳ አሳቲ ባንታ ጎዳስ አማኔቲዳይሳታ ጊዳናው ቤሴስ። ³ ሺን ሂንቴ ዎይኮ ሃራይ ታና ፐርዲኮ፤ ታው አይኮካ ጊዴና። ሃራይ አቶ፤ ታካ ታ ቦላ

3:6 ሃ.አ 18:4-11፤ 24-28 3:16 1ቆሮ 6:19፤ 2ቆሮ 6:16 3:19 ኢዮ
5:13 3:20 ማዝ 94:11

ፐርዲኬ። ⁴ ታ ካሃይ ጌሺ፣ ሺን ሄሲ ታ ፖሎ ሂሎ ጊዴይሳ ቤሴና። ታ ቦላ ፐርዳናይ ጎዳ ሃላላ። ⁵ ሄሳ ጊሾ፣ ዎዴይ ጋኮና፣ ጎዳይ ዮና ኦዴ ቦላካ ፐርዶፊቴ። ኢ ዱማን ጌሚዳባ ፖፖ ኬሴና፤ አሳ ዎዳናን ቆሴቲዳ ቆፋ ቆንጨሳና። ሄ ዎዴ ኢሶይ ኢሶይ ያሳፊ ጋላታ ኤካና።

⁶ ታ ኢሻቶ፣ ሂንቴ ጊሾ አጲሎሳኔ ታና ሌሚሶ አሳዳ ሂንቴው አዳስ። ሄሳ ታ አሲዳይ፣ «ግፌቲዳይሳፊ አዶፋ» ያጊያ ዞሪያ ሂንቴ ኑፔ ታማራና ሜላሳ። ሄሳ ጊሾ፣ አኒካ ኢሱዋ ሳቢዲ ሃንኩዋ ካዳናው ቤሴና። ⁷ ኔ ሃራታፔ አይቢን አዳይ? ኔኒ ኤካቦናባይ አይቢ ዴዒ? ያቲን፣ ኔኒ ኤኪዳባ ሃራ አሳፔ ኤኪዳ ጊዲኮ፣ ኤኪቦና አሳዳ አይስ ጨቁታይ?

⁸ ሃዒ ሂንቴ ካሊዴታ። ሃዒ ሂንቴ ዱሬቲዴታ። ኑኒ ባይና ሂንቴ ሃላላ ካዎቲዴታ። ሂንቴ ቱማ ካዎቲዳባ ጊዲያኮ፣ ኑካ ሂንቴራ ካዎታናሺን። ⁹ ያሳይ ኑና ሃዋሬታ፣ ሃይቆ ፐርዴቲዳ አሳዳ አሳ ኡባፊ ኑና ጉዬ አሲዳ ታው ዳኔስ። ኑኒ ሃ አላሚያስ፣ ኪታንቾታሲኔ አሳስ ካሳባ ጊዲዳ።

¹⁰ ኑኒ ኪሪስቶሳ ጊሾ ኤያ ጊዲዳ፣ ሺን ሂንቴ ኪሪስቶሳን ጨንጫታ ጊዲዴታ። ኑኒ ዳቡራንቾ፣ ሺን ሂንቴ ሚኖ ጊዲዴታ። ሂንቴ ቦንቼቲዴታ፣ ሺን ኑኒ ቶሼቲዳ። ¹¹ ሃዒ ጋካናው ኑ ኮሻቶስ፣ ሳዎቶስ፣ ካሎቶስ፣ ዋዴቶስ፤ ዳና ሶ ዳይዲ ቶይላቶስ። ¹² ኑኒ ኑ ኩሼን አሲ አቆስ፣ ኑና አሲ ባዲያ ዎዴ አንጆስ፤ ኑና ጎዲያ ዎዴ ዳንዳዎስ። ¹³ ኑ ቦላ ኢታባ አዴቲያ ዎዴ ሎፖ ቃላ ዛሮስ። ኑ ሃዒ ጋካናው ሃ አላሚያ ፒቶኔ ዎራ ዩጌቲያ ቡሬ ጊዲዳ።

¹⁴ ታኒ ሄሳ ግፊዳይ፣ ታ ሲቂያ ናይታዳ፣ ሂንቴና ዞራናው ግፋሲፔ አቲን ዩላያናው ጊዴና። ¹⁵ ኪሪስቶሳን ሂንቴና ዲቺያ ታይቦፔ ቦላ ጊዲዳ ካሌሴይሳቲ ዴዒኮካ፣ ሂንቴው ኢሲ አዉ ዴዔስ። ታ ሂንቴና ኪሪስቶስ ዩሱሳ ዎንጌላን ዩላስ። ¹⁶ ሂዛ፣ ሂንቴ ታና ሌሚሶ አሲዲ ካላና ሜላ ሂንቴና ዎሳይስ። ¹⁷ ሄሳ ጊሾ፣ አማኔቲዳ፣ ታ ሲቂያ፣ ጎዳን ታ ናዓ፣ ሂዎቲዮሳ ሂንቴኮ ኪታስ። ኢ ዱማ ዱማ ቤሳን ዴዒያ ዎሳ ኬላን ታ ታማርሲዳ፣ ኪሪስቶሳ ዩሱሳን ዴዒያ ታ አጊያ ሂንቴና ሃሳዩሳና።

¹⁸ ታኒ ሂንቴኮ ዮናባ ዳኒን፣ አቶሪያ ኢሲ ኢሲ አሳቲ ዴዎሶና። ¹⁹ ሺን ጎዳይ ጊኮ፣ ማታ ዎዴ ታኒ ሂንቴኮ ባና። ሄ ዎዴ አቶራንቾታ አዳ ሃላላ ጊዶናሺን ኤንታ ዎልቃካ ኤራና። ²⁰ ያሳ ካዎቴሳይ አዳ ጊዶናሺን ዎልቃ። ²¹ ታኒ ሂንቴኮ ግምግራ ቦዩ ዎይኮ ሲቆራኔ አሽኬ አያናራ ቦ? አዉሳ ዶሬቲ?

5

አማኒያ አሳ ጊዶን ዴዲያ ዮላያ አሶ

1 ሂንቴ ጊዶን ላይማቴሲ ዴዲያሲ ዚጊሬቴስ። ሄሳ ሜላ ላይማቴሲ ሃሪ አቶሺን፣ አማኖና አሳይካ አሶኮና። ሂንቴ ጊዶን ባ አዋ ማቼራ ቱኒዳ አሲ ዴዲስ። 2 ሄሳን ሂንቴ ቂሮታናዉኔ ዮላታናው ቤሴኔ፣ ሺን አቶርቲዴታ። ሄሳ ሜላ ቦርሶባ አሲዳ ኡራ ሂንቴ ጊዶፌ ኬሳናው ቤሴኔ?

3 ታኒ አሾን ሂንቴራ ዶና ኢቂኮካ አያናን ታ ሂንቴራ ዴዲያስ። ታኒ ሂንቴራ ዴዲያ አሳዳ ሃናዳ ሄሳ ሜላ አሶዋ አሲዳ ኡራ ቦላ ፐርዳስ። 4 ኑ ኅዳ ዮሱስ ኪሪስቶሳ ሱንሳን ሂንቴ ሺቂያ ዎዴ ታኒ አያናን ሂንቴራ ዳና። ሄሳን ኅዳ ዮሱስ ኪሪስቶሳ ዎልቃይ ሂንቴራ ጊዳና። 5 ሄ ኡራ ናጋራ አሾይ * ዳዩዲ፣ ኢያ አያናይ ኅዳ ዮሱሳ ፐርዳ ጋላሳን አታና ሜላ ኢ ሃላሄስ አዲ ኢሜቶ።

6 ሂንቴ ጩቆይ ሎዎ ጊዴና። ጉሳ ኢርሾይ ሙኑቃ አብ ዴንሴይሳ ኤሬኬቲዬ? 7 ሂንቴ ሃሲ ኢርሾይ ባይና ሙኑቃ ጊዳና ሜላ፣ ናጋራ ኢርሾዋ ሂንቴፌ ኬሲቴ። ኑስ ፓሲካ ዶርሳ ጊዲዳ ኪሪስቶሲ ያርሼቲስ። 8 ሄሳ ጊሾ፣ ኔኔይኔ ኢታቴሲ ዴዲያ ኢርሾዋራ ጊዶናሺን ቱማቴሲኔ ኔሻቴሲ ዴዲያ ኡይሳራ ኑ ባሲያ ቦንቾስ።

9 ታ ካሴ ሃሬዳ ዳብዳቢያን ሂንቴ ላይማቴያ አሳራ ጋሄቶና ሜላ ሂንቴው አዳስ። 10 ሄሳ ጉሳይ ሃ አላሚያን ዴዲያ ላይማቴይሳታራ ዎይኮ ኡዜታራ ዎይኮ ካይሶታራ ዎይኮ ኤቃ ኅይኔይሳታራ ፖሎ ጋሄቶሬቴ ጉሱ ጊዴና። ሄሳ ጊዲኮ፣ ሃ አላሚያፕ ሂንቴ ኬያናው ቤሴስ ሺን አቲስ። 11 ሺን አማናይስ ያጊሼ ላይማቴይሳታራ ዎይኮ ኡዜታራ ዎይኮ ኤቃ ኅይኔይሳታራ ዎይኮ ጫዮይሳታራ ዎይኮ ማሶቴይሳታራ ዎይኮ ካይሶታራ ጋሄቶሬቴ ጋዳ ሂንቴው አዳይስ። ሄሳ ሜላ አሳራ ሃሪ አቶሺን፣ ካሲካ ሞፒቴ።

12 ዎሳ ኬሳፌ ካሬራ ዴዲያሳታ ቦላ ፐርዳናው ታና አይቤ ጋሴይ? ዎሳ ኬሳን ዴዲያሳታ ቦላ ሂንቴ ፐርዴኬቲዬ? 13 ሺን ካሬራ ዴዲያሳታ ቦላ ዎሳይ ፐርዳና። ሄ ኢታባ አሲያ ኡራ ሂንቴ ጊዶፌ ኬሲቴ።

6

አማኒያ አሳ ጊዶን ዴዲያ ሞቶ

5:1 ዛሬ 22:30 * 5:5 ናጋራ አሾይ፣ ናጋራ ሜዶይ ዎይኮ ናጋራ አሳቴሳይ።
5:6 ጋላ 5:9 5:7 ኬሳ 12:5 5:8 ኬሳ 13:7፤ ዛሬ 16:3 5:13 ዛሬ
13:5፤ 17:7

1 ሂንቴ ጊዶፌ ኢሶይ ኢሱዋራ ሞቶይ ዴዲኮ፣ ሄሳ አማኒያ አሳ ሲንሳን ፐርዴታናይሳ አጊዲ አማኖና አሳ ሲንሳን ፐርዴታናው ዋኒዲ ቢ? 2 ጌሻቲ አላሚያ ቦላ ፐርዳናይሳ ሂንቴ ኤሬኬቲ? ያቲን፣ ሂንቴ አላሚያ ቦላ ፐርዳናይሳ ጊዲኮ፣ ሃይሳ ሜላ ጉሳባ ፐርዳናው ዋኒዲ ዳንዳዔኬቲ? 3 ኑኒ ኪታንቾታ ቦላ ፐርዳናይሳ ኤሬኬቲ? ያቲን፣ ሃ ሳዓ ዱሳባ ቦላ ፐርዳናይሳ ሂንቴና ዋኒዲ ያኒ? 4 ያቲን፣ ሄሳ ሜላ ሜቶይ ሂንቴ ጊዶን ሜዴቲኮ፣ ዎሳ ኬሳ አይሬን ካዴቲዳ አሳ ሲንሳን ፐርዴታናው ዋቲ ኤሬቲ? 5 ታኒ ሂንቴና ዩላያናው ሄሳ ጋይስ። ሂንቴ ጊዶን ካጩቲዳ አሳታ ሲጌላናው ዳንዳዒያ አኪካ አሲ ባዌ? 6 ያቲን፣ ኢሲ አማኔይሲ ሃንኮ አማኔይሳ ፐርዳ ኬሳን አማኖና አሳ ሲንሳን ሞታናው ቤሲ?

7 ሂዛ፣ ሂንቴ ኢሶይ ኢሱዋ ሞቲያባ ጊዲኮ ሄሲ ሂንቴ ኩንዴሳ ቤሴስ። ሄሳፌ ሂንቴ ቆሄቲኮኔ ጨሜቲኮ ኬሄኔ? 8 ሺን ሂንቴ ዎሊ ጊዶን አማኔይሳቲ ኢሶይ ኢሱዋ ቆሄታኔ ጨሜታ።

9 ጌላቲ ዎሳ ካዎቴሳ ላቶናይሳ ሂንቴ ኤሬኬቲ? ሂንቴና ጨሞሬቲ፣ ላይማቴይሳቲ ዎይኮ ኤቃ ጎይኔይሳቲ ዎይኮ ቃይዲይሳቲ ዎይኮ አዴራ አዴራ ጋሄቴይሳቲ፣ 10 ዎይኮ ካይሶቲ ዎይኮ ኡዜቲ ዎይኮ ማሶቴይሳቲ ዎይኮ ጫዬይሳቲ ዎይኮ ቦንቆይሳቲ ዎሳ ካዎቴሳ ላቶኮና። 11 ሂንቴፌ ኢሲ ኢሲ አሳቲ ካሴ ሄሳ ሜላ። ሺን ሂንቴ ሃዒ ጎዳ ዩሱስ ኪሪስቶሳ ሱንሳኒኔ ዎሳ አያናን ሜጨቲዴታ፤ ጌዩዴታ፤ ጊሊዴታ።

ሂንቴ አሳቴሳን ዎሳ ቦንቹቲ

12 ሂንቴ፣ «ኑ ኮዩዳባ አሳናው ዳንዳዎስ» ያጌታ። ሺን ኡባይ ሂንቴና ማዴና። ታኒ ኮዩዳባ ኡባ አሳናው ዳንዳዎይስ፣ ሺን አይቢካ ታና ሃሬና። 13 ሂንቴ፣ «ካሲ ኡሎሳ፤ ኡሎይካ ካሳሳ» ያጌታ። ሺን ዎሳይ ኡሎዋካ ካሳካ ዳይሳናይሳ ታ ሂንቴው አዳይስ። ኑ አሳቴሳይ ጎዳሳፌ አቲን ላይማቴሳሳ ጊዴና። ጎዳይካ ኑ አሳቴሳሳ። 14 ዎሳይ ጎዳ ሃይቆፔ ዴንሲዳይሳዳ፣ ኑናካ ሃይቆፔ ባ ዎልቃን ዴንሳና።

15 ሂንቴ አሳቴሳይ ኪሪስቶሳ አሳቴሳፌ ባጋ ጊዴይሳ ኤሬኬቲ? ያቲን፣ ታኒ ኪሪስቶሳ አሳቴሳፌ ባጋ ኤፋዳ ላይማቴሳ አሳቴሲ ጊዳና ሜላ አሶ? ሃኔና! 16 ላይማቴያ ኡራይ ኢ ጋሄቲያ አሴራ ኢሲ አሳቴሲ ጊዴይሳ ኤሬኬቲ? ጌሻ ማፃፋን፣ «ኤንቲ ናምዓይ ኢሲ አሳቴሲ ጊዳና» ጌቲቲዲ ፃፌቲስ። 17 ሺን ጎዳራ ኢሲሬያ ኡራይ ኢያራ አያናን ኢሶ ጊዴስ።

18 ላይማቴሳፌ ሃኪቲ። ኢሲ ኡራይ አሲያ ሃራ ናጋራይ ኢያ አሳቴሳፌ ካሬራ አሴቲስ፣ ሺን ላይማቴያ አሲ ባ አሳቴሳ

ቦላ ናጋራ አሴስ። 19 ሂንቴ አሳቴሳይ ያሳይ ሂንቴው ኢሚዳ ሂንቴናን ዴዲያ ገሻ አያና ኬሲ ጊዴይሳ ኤሬኬቴ? ሂንቴ ሂንቴባ ጊዴኬታ። 20 ያሳይ ሂንቴና ጋቴን ሻሚስ። ሄሳ ጊሾ፣ ሂንቴ አሳቴሳን ያሳ ቦንቺቴ።

7

ኤኮ ጌሎባ

1 ሂንቴ ታው ዓፊዳ ዳብዳቢያስ ዛሮይ ሃይሳ። ኢሲ አሲ ማቾና ዴዲኮ ሎዎ። 2 ሺን ላይማቴሳፌ አታናው ኢሲ ኢሲ አዴይ ማቾ ኤኮ፤ ቃሲ ኢሲ ኢሲ ማጫሳስ አዘኒ ዴዎ።

3 አዘናይ ባ ማቼስ፣ ቃሲ ማቺያ ባ አዘናስ ቤሲያባ ኩንሶ። 4 ማቼስ ባ አሳቴሳ ቦላ ኢው ማቲ ባዋ፣ ሺን ማታይ ኢ አዘናሳ። ሄሳዳካ፣ አዘናስ ኢያ አሳቴሳ ቦላ ማቲ ባዋ፣ ሺን ማታይ ማቼሳ።

5 ሂንቴ ዎሳን ጉሳ ዎዴ ጋምዓናው ዘሬቴሳን ጊዶና ኢዲኮ፣ ኢሶይ ኢሱዋ ዲጎፊቴ። ሄሳ ጋሶን ሂንቴናቴሳ ሃራናው ያኔቴን፣ ዓላሄይ ሂንቴና ፓጮና ሜላ ኢሲፌ ዴዲቴ። 6 ሺን ታኒ ሂንቴና ዘራናው ሃይሳ ጋይሲፔ አቴን ኪታ ጊዴና። 7 አሲ ኡባይ ታዳ ማቾ ኤኮና ዴዲያኮ ዶሳይስ፣ ሺን ያሳይ ኢሱዋስ ኢሱዋስ ኢሚዳ ዱማ ኢሞቲ ዴዴስ። ኢሱዋስ ሃይሳ ሜላ ሃንኩዋስ ሄሳ ሜላ ኢሞቲ ዴዴስ።

8 ማቾ ኤኪቦናይሳታሲኔ አዘና ጌሊቦናይሳታስ ቃሲ አምዔታስ ታኒ ጌይ፣ ታዳ ኤኮና ዎይኮ ጌሎና ዴዲቴ ጋዳ ዘራይስ። 9 ሺን አሞን ፀጌቴይሳፌ ኤኬይሲኔ ጌሌይሲ ሎዎ ጊዲያ ጊሾ ኤንቴ ባንታና ሃራናው ዳንዳዎና ኢዲኮ፣ ኤኮኔ ጌሎ።

10 ታኒ ኤኪዳይሳታኔ ጌሊዳይሳታ ሃይሳዳ ጋዳ ዘራይስ፤ ታና ጊዲኬ ጎዳይ ኪቴስ፤ ማቺያ ባ አዘናፔ ሻኬቶ። 11 ሺን ሻኬቲኮ ሃራ አዘና ጌሎና ባርካ ዴዎ ዎይኮ ባ አዘናራ ጊጎ፣ አዘናይ ባ ማቺው ቢሎ።

12 ሺን ሃራታስ ጎዳ ጊዶናሺን ታኒ ሃይሳዳ ጋይስ። አማኖና ማቾ ዴዲያ አማኒያ አዘኒ ዴዲኮ፣ ኢያ ማቺያ ኢያራ ኢሲፌ ዳናው ኮይኮ ኢዮ ቢሎ። 13 ቃሲ አማኖና አዘኒ ዴዲያ አማኒያ ማቾ ዴዲኮ፣ ኢ አዘናይ ኢራ ኢሲፌ ዳናው ኮይኮ ኢያፔ ቢሎቶ።

14 አማኖና አዘናይ ባ አማኒያ ማቼ ባጋራ ጌዮስ፤ ቃሲ አማኖና ማቺያ ባ አማኒያ አዘና ባጋራ ጌያዉሱ። ሄሲ ባይኔኮ፣ ሂንቴ ናይቲ ቴና ጊዶሶና፣ ሺን ሃሲ ኤንቴ ጌሺ። 15 ሺን አማኖና አዘናይ ዎይኮ ማቺያ ቢላናው ኮይኮ ቢሎ። አማኒያ ማቺያ ዎይኮ

6:19 1ቆሮ 3:16፤ 2ቆሮ 6:16 7:10 ማቶ 5:32፤ 19:9፤ ማር 10:11-12፤ ሉቃ 16:18

አዚናይ ሄሳ ሜላባን ቃሼቶኮና። ሦሳይ ኑና ሳርቴላን ዳና ሜላ ሄጊስ። 16 አማኒያ ማቼቴ፥ ኔኒ አማኖና ኔ አዚና አሻኔኮ አይ ኤራይ? ዎይኮ አማኒያ አዚናው፥ ኔኒ አማኖና ኔ ማቼው አሻኔኮ አይ ኤራይ?

ሦሳይ ሂንቴና ሄጊዳይሳዳ ዴቲቴ

17 ኢሲ ኢሲ አሲ ጎዳይ ኢያው ኢሚዳ ኢሞታዳይ ሦሳይ ኢያ ሄጊዳይሳዳ ዴታ። ሦሳ ኬሳ ኡባን ታኒ ታማርሲዳ ዎጋይ ሃይሳ። 18 ኦኒካ ቃፃሬቲዲ አማኒዳባ ጊዲኮ፥ ቃፃሬቶናዳ ሃኖፖ። ቃፃሬቶና አማኒዳ ኦኒካ ዴቲቴ፥ ቃፃሬታናው ኮዮፖ። 19 ሦሳ ኪታ ፖላናው ቤሴስፔ አቲን ቃፃሬቲን ቃፃሬቶና አጊን አይኮካ ማዴና።

20 ኢሲ ኢሲ አሲ ሦሳይ ባና ሄጊያ ዎዴ ዴዔይሳዳ ዴታ። 21 ሦሳይ ኔና ሄጊያ ዎዴ ኔኒ አይሌ? አይኮይ ባዋ ሄሳስ ኡንዔቶፋ። ሺን ኔኒ አይሌቴሳፌ ላዓ ኬያናው ዳንዳዒኮ ዩዳ ኬያ። 22 አይሌ ጊዲ ዴቲቴ ጎዳን ሄጊቲዳ አሲ ጎዳን አይሌቴሳፌ ላዓ ኬያ። ሄሳዳካ፥ አይሌ ጊዴና ዴቲቴ፥ ጎዳን ሄጊቲዳ አሲ ኪሪስቶሳ አይሌ። 23 ሦሳይ ሂንቴና ጋቴን ሻሚዳ ጊሾ አሳ አይሌ ጊዴፒቴ። 24 ታ ኢሻቶ፥ ሂንቴ ኢሶይ ኢሶይ ሄጊቲያ ዎዴ ዴዒያ ዴዑዋን ሦሳራ ኢሲፌ ዴቲቴ።

ኤኪቦና፥ ጌሊቦና አሳባኔ አምዔታባ

25 ጌላዎታባ ጎዳይ ታና ኪቲዳባይ ባዋ። ሺን ጎዳይ ታው ኢሚዳ ማርቴሳ ሜላ ታኒ ሂንቴና ዞራይስ። 26 ሂዛ፥ ሃዒ ሜቴዋ ጊሾ ኤኮና ዎይኮ ጌሎና ዱሲ ታው ሎዎ ዳኔስ። 27 ኔ ማቾ ኤኪዳባ ጊዲኮ፥ ቢላናው ኮዮፖ። ኔ ማቾ ኤኪቦናባ ጊዲኮ፥ ኤካናው ኮዮፖ። 28 ሺን ኔ ማቾ ኤኪኮ ናጋሪ ባዋ። ሄሳዳ ጌላዒያካ አዚና ጌሊኮ ናጋሪ ባዋ። ሺን ኤኪያ ጌሊያ አሳስ ሃ ሳዓን ዳሮ ሜቶይ ዴዒያ ጊሾ ሂንቴ ሄሳፌ አታና ሜላ ታ ኮያይስ።

29 ታ ኢሻቶ፥ ታ ጌይ ሄሳ፤ ዎዴይ ዉሪስ። ሂዛፔ ሲንሴ ማቻ ዴዔይሲ ማቾ ኤኮናይሳዳ ዴታ። 30 ዩኪይሳቲ ዩኮናዳ፥ ኡፋይቴይሳቲ ኡፋይቶናዳ፥ ሻሚይሳቲ አይኮይካ ባይናዳ ባንታና ታይሶ። 31 ሃ ሳዓ ሻሎዋን ማዴቴይሳቲ ማዴቲቦናዳ ሃኖ። ሃ አላሚያ ማላይ አዳና።

32 ሂንቴ ሂርጊ ባይና ዳና ሜላ ታ ዶሳይስ። ማቾ ኤኪቦናይሲ ጎዳ ኡፋይሳናው ኮያ ጊሾ ጎዳባ ቆፔስ። 33 ሺን ማቾ ኤኪዳይሲ ባ ማቼው ኡፋይሳናው ኮያ ጊሾ ሃ ሳዓባ ቆፔስ። 34 ኢያ ቆፋይ ናምዓን ሻኬቴስ። አዚና ጌላቦና ጌላዒያ ባ አሳቴሳኒኔ ባ ሺምፑዋን ጌያዳ ጎዳ ኡፋይሳናው ኮያ ጊሾ ጎዳባ ቆፓውሱ። ሺን አዚና ጌሊዳራ ባ አዚና ኡፋይሳናው ኮያ ጊሾ ሳዓባ ቆፓውሱ።

35 ታኒ ሄሳ ሂንቴው አደይ፤ ሂንቴ ማዴታና ሜላሳፌ አቲን ሂንቴና ኡንዔሳናው ጊዴና። ሺን ሂንቴ ቆፋይ ሻኬቶና ማራን ዴዒዲ ጎዳ ኡፋይሲያባ ሂንቴ አሳና ሜላ ታኒ አዳይስ።

36 አኒካ ባ አይቺዳ ጌላዔስ ጌሎ ዎዴይ አዲስ ጊዲ ኢዮ አጋናው ቆፒኮ፤ ሄሲ ቃሲ ኢው ሎዎ ጊዶናይሲ ኢያው ሲዔ ቲኮ፤ ባ ኮዩዳይሳ አሶ፤ ኤንቲ ኤኬቶ፤ ጌሌቶ፤ ሄሳን ናጋሪ ባዎ።

37 ሺን ኢሲ አሲ ኡንዔሲያባይ ዳዩን፤ ባ ዎዛናን ሚኒዲ፤ ባና ሃሪዲ፤ ባ አይቺዳ ጌላዒው ኤኮና አጋናው ኮይኮ ሎይሲስ። 38 ሄሳ ጊሾ፤ ጌላዒው ኤኪያ ኡራይ ሎይሲስ፤ ቃሲ ኤኮና ኡራይ ዳሮ ሎይሲስ።

39 ማቺያ ባ አዚናይ ፓፃ ዴዒያ ዎዴ ኡባን ኢያራ ቃሺታሱ። ሺን ኢ አዚናይ ሃይቂኮ፤ ባ ዶሲዳ አዚና ጌላናው ዳንዳፃውሱ። ጊዶሺን፤ ኢያ ጌሊያ አዴይ አማኒያ አሲ ጊዳናው ቤሴስ። 40 ታ ቆፋን ጊዲኮ፤ ኢያ ጌሎና ዴዒኮ ኡፋይሳን ዳና። ቃሲ ታው፤ ታ ቦላ ያሳ አያኒ ዴዒያ ዳኔስ።

8

ኤቃስ ያርሼቲዳ ካሳባ

1 ኤቃስ ያርሼቲያ ካሳባ ጊዲኮ ኑ ኡባይ ኤሮስ። ኤራቴሲ አቶርሴስ፤ ሺን ሲቆይ ዲቼስ። 2 አኒካ ባና ኤራይስ ጊዲ ቆፒኮ፤ ኢ ቡሮ ኤራናው ቤሴይሳ ኤሪቤና። 3 ሺን አኒካ ያሳ ሲቂኮ ኢ ያሳ ማታን ኤራቲዳይሳ።

4 ሄሳ ጊሾ፤ ኤቃስ ያርሼቲዳ ካሲ ሙሳባ ጊዲኮ ሃ አላሚያን ጎዲ ኢሲ ያሳፌ አቲን ሃሪ ባይና ጊሾ ኤቂ ፓሶናባ ጊዴይሳ ኑኒ ኤሮስ። 5 ዎሴ ጊዶናሺን ሳሎኒኔ ሳፃን ዎሴ ጌቴቲ ዌጌቲያ ዳሮ ያሳቲኔ ጎዳቲ ዴዒኮካ፤ 6 ኡባባ ሜዲዳ፤ ኑ ኢያ ጊዲዳ፤ ኢሲ ያሳይ፤ አዎይ፤ ኑስ ዴዔስ። ኡባይ ኢያ ባጋራ ሜዴቲዳ፤ ኑካ ኢያ ባጋራ ዴዎ ዴሚዳ ኢሲ ጎዳይ፤ ዩሱስ ኪሪስቶሲ ኑስ ዴዔስ።

7 ሺን ሃይሳ ኤራይ ኡባ ጊዴና። ኢሲ ኢሲ አሳይ ኤቃ ጎይኖራ ሜዜቲዳ ጊሾ ካሲ ሚያ ዎዴ ኤቃስ ያርሼቲዳባ አሲዲ ኤኮሶና። ሄ ዎዴ ኤንታ ካሃይ ዳቡራ ጊዲያ ጊሾ ቱኔስ። 8 ሺን ካሲ ኑና ያሳራ ዳቡዮና፤ ኑ ሞና አጊዲ አይኮካ ቆሄቶኮ፤ ቃሲ ሚዲ ዱማ ጎዔቶኮ።

9 ሺን ሂንቴ ኮዩዳባ ማናው ላፃቴሲ ሂንቴው ዴዒኮካ ሄሲ አማኖን ሚኖናይሳታ ዳቡና ሜላ ናጌቲቴ። 10 ኔኒ ኔና ኤራንቾ ጋዳ ኤቃስ ያርሼቲዳ ካሲ ማናው ኤቃ ኬሳን ኡቲዳሺን፤ አማኖን ሚኖናይሲ ኔና ቤዒኮ ሄሲ ኢያ ኤቃስ ያርሼቲዳ ካሲ ማና ሜላ ዴንሴሴኔዮ? 11 ሂዛ፤ ኔ ኤራቴሳ ጋሶን ኪሪስቶሲ ኢያ ጊሾ

ሃይቂዳ፣ አማኖን ሚኖና ኔ ኢሻይ፣ ዳይስ። 12 ሄሳዳ አሲዲ፣ አማኖን ሚኖና ሂንቴ ኢሻታ ቆሂሼኔ ኤንታ ካሃ ማዱንጊሲሼ ኪሪስቶሳ ቆሄታ። 13 ሄሳ ጊሾ፣ ካሲ ታ ኢሻ ዱቢያባ ጊዲኮ፣ ኢ ዱቤቶና ሜላ አሾ ኡባራካ ሚኬ።

9

ሃዋሬታ ማታ

1 ታኒ ዩዳ ዴዲያ አሲ ጊዲኪና? ታ ሃዋሬ ጊዲኪና? ታኒ ኑ ጎዳ ዩቡስ ኪሪስቶሳ ቤዓቢኪና? ሂንቴ ጎዳን ታ ዳቡራ አይፌ ጊዴኬቲ? 2 ሂንቴ ጎዳባ ጊዲያ ጊሾ ታ ሃራታስ ሃዋሬ ጊዶና ኢዲካካ፣ ሂንቴው ሃዋሬ ጊዴይሳስ ሂንቴ ማርካ።

3 ታና ሃዋሬ ጊዴና ጊይሳታስ ታ ኢሚያ ዛርይ ሃይሳ። 4 ኑ ሂንቴፌ ማናዉኔ ኡያናው ቱማ ኑስ ማቲ ባዌ? 5 ሃንኮ ሃዋሬታዳ፣ ጎዳ ኢሻታዳኔ ጳጊሮሳዳ፣ አማኒያ ኑ ማቼታ ኤኪ ሃሙታናው ኑስ ማቲ ባዌ? 6 ዎይኮ አሲዲ ማናው ቤሴይ ታራኔ ባርናባሳ ዓላሌ? 7 ባ ሚሼን ዎታዳሬታሊ አሴይ አኔ? ዎይኮ ዎይኔ ቶኪዲ፣ ኢያፕ አይፌ ሞናይ አኔ? ዎይኮ ዉዴ ሄሚሼ፣ ሄ ዉዲያፕ ማሊ ኡዮናይ አኔ?

8 ታኒ ሄሳ አሳ ቆፋሶ ጋይናዩ? ሂጌይ ሄሳ ጌኔ? 9 ሙሴ ሂጊያን፣ «ዉዱማን ካሳ ዩዲያ ቦራ ዶና ቃቾፋ» ጌቲቲዲ ዓፌቲስ። ያቲን ያሳይ ሄሳ ቦራስ ቆፒዲ ጊዴ? 10 ያሳይ ሄሳ ጊዳይ ኑስ ቆፒዲ ጊዴኔ? ኤ ኑ ጊሾሳ። ጎዩይሲካ፣ ካሳ ጊሼይሲካ ባና ጋኬይሳ ኤካና ጊዲ ኡፋይሳን አሳናው ቤሴስ ጌቲቲዲ ቱማ ኑ ጊሾ ዓፌቲስ። 11 ኑኒ ሂንቴ ጊዶን አያና ዜሬሊ ዜሪዳ ጊዲኮ አሾስ ኮሺያባ ኑ ሂንቴፌ ኤኪኮ፣ ሄሲ ጊታባዩ? 12 ሃራቲ ሄሳ ሂንቴፌ ኤካናው ኤንታው ማቲ ዴዲኮ፣ ኑስ ኤንታይሳፌ አዲያ ማቲ ዴዔስ።

ሺን ኑኒ ኪሪስቶሳ ዎንጌላስ ዱቤ ጊዶና ሜላ፣ ኡባ ጌንጮሲፕ አቲን ሄ ማታን ጎዔቲቦኮ። 13 ያሳ ኬላን አሊያ አሳቲ ባንታ ካሳ ያሳ ኬላፌ ኤኬይሳ ኤሬኬቲ? ቃሲ ያርሾ ቤሳን አሴይሳቲ ያርሹዋፌ ኤኬይሳ ኤሬኬቲ? 14 ሄሳዳካ፣ ዎንጌላ ማርካቴይሳቲ ዱሳስ ኮሺያባ ዎንጌላፕ ኤካና ሜላ ጎዳይ ኪቲስ።

15 ሺን ታኒ ሃ ማታ ኡባን አይኮካ ጎዔታቢኬ። ታኒ ሃይሳ ዓፌዳይ ታ ማታ ቦንቼሳናው ኮያዳ ጊዴና። አኒካ ታ ጩቁዎ ሃዳ አሳናፕ ሃይቆይ ታው ሎዎ። 16 ታኒ ዎንጌላ አዴይ ኪቲቲዳ ጊሾሳፌ አቲን ታና ጩቁሲያባ ጊዴና። ዎንጌላ አዶና ኢዲኮ፣ ታና አዩ። 17 ታኒ ዎንጌላ ዶሳዳ ሳባኪኮ ታው ዎይቶይ ዴዔስ።

9:9 ዛሬ 25:4፣ 19ጥ 5:18 9:11 ሮሜ 15:27 9:14 ማቶ 10:10፣ ሉቃ 10:7

ሺን ታኒ ዎንጌላ ዶሶና ኪቴታዳ ሳባኪያባ ጊዲኮ ሄሳ ያሳይ ታው ሃዳራ ኢሚስ።¹⁸ ያቲን፣ ታ ዎይቶይ አይቤ? ታኒ ዎንጌላ ሳባኪያ ዎይ ታ ማታን ጎዔቶና ዎንጌላ ጮ ሳባኪይሲ ታው ዎይቶ።

¹⁹ ታኒ አዴስካ አይሌ ጊዲኬ፣ ሺን ዳሮታ አሻናው ኡባስ አይሌ ጊዳስ።²⁰ ታኒ አይሁዴታ አሻናው ኤንታራ ኤንታ ጊዳስ። ታ ሁዔን ሂጌፌ ጋርሳን ዴዒኬ፣ ሺን ሂጌፌ ጋርሳን ዴዒይሳታ አሻናው ሂጌፌ ጋርሳን ዴዒያ አሲ ጊዳስ።²¹ ያሳ ሂጊያፌ ካሬ ኪዮና፣ ኪሪስቶሳ ሂጊያስ ኪቴታሹ፣ ሂጌይ ባይናይሳታ አሻናው ሂጌይ ባይና አሳዳ ጊዳስ።²² ታኒ ዳቡራንቾታ አሻናው ዳቡራንቾ ጊዳስ። ታኒ ጉሳታ አሻናው ኡባራ ኡባ ሃናስ።²³ ታኒ ዎንጌላ አንጾዎ ሻኪታናው፣ ሃ ኡባ ዎንጌላ ጊሾ ሃናስ።

²⁴ ዎሳን ጋዴቲያ ኡባይ ዎዔስ፣ ሺን ኢሱዎ ፃላሊ ዎይቶ ኤኬይሳ ኤሬኬቲ? ሄሳዳ ሂንቴካ ዎይቱዎ ኤካናው ዎዒቱ።

²⁵ ጋዴቲያ አሳ ኡባይ ኡባባን ባንታና ሃሬስ፣ ኤንቲ ሄሳ ዳቡራይ ዳያ ካላቻ ዎይቶ ኤካናሳ። ሺን ኑኒ ዳቡራይ ሜሪና ካላቻ ዎይቱዎ ኤካናሳ።²⁶ ሄሳ ጊሾ፣ ታኒ ቆሬ ባይና አሳዳ ዎዒኬ። ጮርኮ ዩምፒያ አሳዳ ጮ ኩሼ ዩዲኬ።²⁷ ሺን ታኒ ሃራታስ ዎንጌላ ሳባኪያፕ ጉዩ ታ ሁዔን ዩጌቲዳ አሲ ጊዶና ሜላ ታ አሳቴሳ ዎልቃን ሃራዳ ታው ኪቴታና ሜላ አሳይስ።

10

ኤቃ ጎይኖሬቲ

¹ ታ ኢሻቶ፣ ታኒ ሂንቴ ሃይሳ አኬካና ሜላ ኮያይስ። ኑ አዎቲ ኡባይ ሻራፔ ጋርሳራ ሃሙቲዶሶና፤ ኡባይ አባ ፒኒዶሶና።

² ኤንቲ ሙሴራ ኢሲፋናው ሻራኒኔ አባን ፃማቄቲዶስና።³ ኤንቲ ኡባይ ኢሲ አያና ካሳ ሚዶሶና።⁴ ቃሲ ኡባይ ኢሲ አያና ኡሻ ኡዩዶሶና፣ ኤንቲ ባንታና ካሊያ አያና ዛላፌ ፑልቲዳ ኡሻ ኡዩዶሶና፤ ሄ ዛላይካ ኪሪስቶሳ።⁵ ሺን ያሳይ ኤንታፌ ዳሮታን ኡፋይቲቦና ጊሾ ኤንታ አሃይ ባዞ ቢታን ዎዲዲ አቲስ።

⁶ ኤንቲ ኢታባ አዎቲዳይሳዳ፣ ኑካ ኢታባ አዎቶና ሜላ ሄሲ ኡባይ ኑስ ሴሚሶ ጊዲስ።⁷ ጌሻ ማፃፋን፣ «አሳይ ማናዉኔ ኡያናው ኡቲዶሶና፤ ቃሲ ዩፃናው ዴንዲዶሶና» ጌቲቲዳይሳዳ ኤንታፌ ኢሶቲ ኢሶቲ ኤቃ ጎይኒዳይሳ ሜላ ሂንቴ ኤቃ ጎይኖሬቲ።⁸ ኤንታፌ ኢሶቲ ኢሶቲ ላይማቲዳይሳዳ ኑ ላይማታናው ቤሴና። ሄሳ ጋሶን ኤንታፌ ኢሲ ጋላስ ላታማኔ

10:1 ኬሳ 13:21-22፤ 14:22-29 10:3 ኬሳ 16:35 10:4 ኬሳ 17:6፤
ታይ 20:11 10:5 ታይ 14:29-30 10:6 ታይ 11:4 10:7 ኬሳ 32:6

ሄዡ ሙኩሉ አሲ ሃይቂስ። 9 ኤንታፌ ኢሶቲ ኢሶቲ ጎዳ ፓጩዲ ሾሻን ዱኬቲዲ ሃይቂዳይሳዳ ኑ ጎዳ ፓጩናው ቤሴና።

10 ኤንታፌ ኢሶቲ ኢሶቲ ዙዙሚዲ ሃይቆ ኤሂያ ኪታንቸዋን ዳዩዳይሳዳ ሂንቴካ ዙዙሞፊቴ።

11 ሃ ኤንታ ቦላ ጋኪዳ ኡባይ ኑ ናጌታና ሜላ ኑስ ሌሚሶ ጊዲስ። ቃሲ ዎዴ ዉርሴሳ ቦላ ዴዲያ ኑስ ቲሚርቴ ጊዳና ሜላ ሃ ኡባይ ሃፌቲስ።

12 ሄሳ ጊሾ፣ ታ ኤቃስ ጊያ አኒካ ኩንዶና ሜላ ባና ናጎ። 13 አሴ ኡባ ጋኪያ ፓጩፔ አቲን ዱማ ፓጩይ ሂንቴና ጋኪቤና። ሂንቴ ዎልቃይ ዳንዳዔይሳፌ አዲያ ፓጩን ሂንቴ ፓጩቶና ሜላ አሲ ኢሞና ያሳይ አማኔቲዳይሳ። ሂንቴና ፓጩይ ጋኪያ ዎዴ ሄ ፓጩያ ኢ ሂንቴና ዳንዳዒሳና። ቃሲ ሄ ፓጩያፔ ሂንቴ ኪያና አጊያ ኢ ጊጊሳና።

14 ሂዛ፣ ታ አልዎ ኢሻቶ፣ ኤቃ ጎይኖፌ ሃኪቴ። 15 ሂንቴ ዎዛናማ አሲ ጊዲዳ ጊሾ ታ ሃይሳ አዳይስ። ታኒ ጌይሲ ቱማ ጊዴይሳ ሂንቴ ሂንቴ ሁዔን ፐርዲቴ። 16 ኑኒ ያሳ ጋላቲዲ ሻኬቲያ አንጆ ፀዓይ ኪሪስቶሳ ሱሳራ ኢሲፌቴሲ ዴዔይሳ ጊዴኔይ? ቃሲ ኑኒ ባሲያ ኡይሳይ ኪሪስቶሳ አሹዋራ ኢሲፌቴሲ ዴዔይሳ ጊዴኔይ? 17 ኑኒ ዳሮ ጊዲኮካ ኡይሳይ ኢሲኖ፣ ኑ ሄ ኢሲ ኡይሳ ሻኬቲያ ጊሾ ኢሲ አሳቴሲ።

18 አኔ ኢስራዔል አሳይ አሲዳይሳ አኬኪቴ። ያርሼቲዳ ያርሹዋ ሜይሳታስ ያርሾ ቤሳራ ኢሲፌቴሲ ባዌይ? 19 ታኒ አይ ጋናው ኮያ ጋይና? ኤቃስ ያርሼቲዳ ካሳይ ዎይኮ ኤቃይ ፓሲያባ ጊዴና። 20 ኤንቲ ያርሼይ ያሳስ ጊዶናሺን ቱና አያናታሳ። ሄሳ ጊሾ፣ ሂንቴው ቱና አያናታራ ኢሲፌቴሲ ዳና ሜላ ኮይኬ።

21 ሂንቴ ጎዳ ፀዓፔ ኡይሼ፣ ቃሲ ቱና አያናታ ፀዓፔ ኡያናው ዳንዳዔኬታ። ጎዳ ጋይታፔ ሚሼ ቃሲ ቱና አያናታ ጋይታፔ ማናው ዳንዳዔኬታ። 22 ኑ ሄሳ አሲዲ ጎዳ ዩሎይኖ? ኑ ኢያፔ አዲያ ሚኖይ?

23 ሂንቴ፣ «ኡባባ አሶና ሜላ ዲጊያባይ ባዋ» ጌታ፣ ሺን ኡባይ ማዴና። ሂንቴ፣ «ኡባባ አሶና ሜላ ዲጊያባይ ባዋ» ጌታ፣ ሺን ኡባባይ ዲቸና። 24 ኢሲ ኢሲ አሲ፣ ሃራ አሲ ማዲያባ ቆፓናው ቤሴሲፔ አቲን ባና ማዲያባ ሃላላ ቆፓፎ።

10:8 ታይ 25:1-18 10:9 ታይ 21:5-6 10:10 ታይ 16:41-49 10:16 ማቶ 26:26-28፣ ማር 14:22-24፣ ሉቃ 22:19-20 10:18 ሌዌ 7:6 10:20 ዛሬ 32:17 10:22 ዛሬ 32:21 10:23 1ቆሮ 6:12

25 ሂንቴ ካሃ ሲደድን ጌልሲያ አይሻ ደንጾና ጊያን ባይዘቲያ አሹዋ ጮ ሚቴ። 26 አይስ ጊኮ፥ «ሳዒኔ ሳዓን ደዒያ ኡባይ ጎዳሳ።»

27 ኢሲ አማኖና አሲ ሂንቴና ኢማታናው ኮዩዲ ዩጊኮ ባናው ኮይኮ ቢቴ። ሂንቴ ካሃን ሜዴቲያ አይሻን ሲዶና ሂንቴ ሲንሴ አሲያባ ኡባ ሚቴ። 28 ሺን ኢሲ አሲ፥ «ሃይሲ ኤቃስ ያርሼቲዳባ» ጊኮ፥ ሄ ሂንቴው አዲዳ አዲያ ጊሾኔ ሂንቴ ካሃ ጊሾ ሄ ካሳ ሞፒቴ። 29 ታኒ፥ ካሃ ጊሾ ጌይ ሄ ሂንቴው አዲዳ ኡራ ካሃ ጉሱፌ አቲን ሂንቴ ካሃ ጊዴና።

ሃራ አሳ ካሃ ጊሾ ጋዳ ታኒ ታ ላዓቴሳ ቦላ አይስ ፒርዶ? 30 ታኒ ሚያ ካሳ ዶሳ ጋላታዳ ሚኮ ባሊዳዳ አይስ ቦሬቲያና?

31 ሂዛ፥ ሂንቴ አይ ሚኮ አይ ኡዩኮ፥ ዎይኮ አይ አሲኮካ ኡባባ ዶሳ ቦንቾስ አሲቴ። 32 አይሁዴታ ጊዲን ጊሪኬታ ጊዲን ዎይኮ ዶሳ ዎሳ ኬሲ ጊዲን አዴስካ ዱቤ ጊዶፒቴ። 33 ታኒ ኡባ ዎዴ ዳርታ አሻናው ኤንቲ ማዴቲያ አጌ ኮያይሲፔ አቲን ታና ማዲያ አጌ ኮዩኪ።

11

1 ታኒ ኪሪስቶሳ ሌሚሱዋ ካሌይሳዳ፥ ሂንቴካ ታና ካሊቴ።

ጎይኖ ማራ

2 ሂንቴ ኡባባን ታና ቆፒያ ጊሾኔ ታ ታማርሲዳ ቲሚርቲያ ሚንሲዲ ናጊዳ ጊሾ ታ ሂንቴና ጋላታይስ። 3 ሺን ኪሪስቶሲ አዴ ኡባስ ሁዔ፥ አዴይ ማጫሳስ ሁዔ፥ ቃሲ ዶሳይ ኪሪስቶሳስ ሁዔ ጊዴይሳ ሂንቴ ኡራና ሜላ ታ ኮያይስ። 4 ባ ሁዒያ ጉሉንቲዲ ዶሳ ዎሲያ ዎይኮ ቲንቢቴ አዲያ አዴ ኡባይ ሁዔ ጊዲዳ ኪሪስቶሳ ቶቼስ። 5 ባ ሁዒያ ቃጮና ዶሳ ዎሲያ ዎይኮ ቲንቢቴ አዲያ ማጫሲያ ሁዔ ጊዲዳ ባ አዚና ቶቻውሱ። ባ ሁዒያ ቃጮና ማጫሲያ ባ ሁዒያ ሜዴቲዳ ማጫሳ ሜላ።

6 ማጫሲ ባ ሁዒያ ቃጮና ኢዲኮ፥ ባ ሁዒያ ቃንጻቶ። ሺን ኢው ሁዒያ ቃንጻይ ዎይኮ ሜዶይ ቦርሶ ጊዲኮ ባ ሁዒያ ቃጮ። 7 አዴይ ዶሳ ሌሚሶኔ ዶሳ ቦንቾ ጊዲያ ጊሾ ባ ሁዒያ ቃቻናው ቤሴና፥ ሺን ማጫሲ አዴስ ቦንቾ። 8 ማጫሲ አዴፌ ሜዴታሱፔ አቲን አዴይ ማጫሳፔ ሜዴቲቤና። 9 ማጫሲ አዴስ ሜዴቲሲፔ አቲን አዴይ ማጫሳስ ሜዴቲቤና። 10 ሃይሳ ጊሾኔ ኪታንቾታ

10:26 ማዘ 24:1 11:1 1ቆሮ 4:16፤ ፊል 3:17 11:7 ሜዴ 1:26-27 11:8 ሜዴ 2:18-23

ጊሾ ማጫሲ ባው ማቲ ዴዔይሳ ቤሲያ ማላ ባ ሁዔን ቃጫናው ቤሴስ።

11 ሺን ጎዳ ቆፋን ማጫሲ አዴይ ባይና ዴና፤ አዴይካ ማጫሲ ባይና ዴዔና። 12 ማጫሲ አዴፌ ሜዴቲዳይሳዳ አዴይካ ማጫሳፔ ዩሌቲስ። ሺን ኡባባይካ ያሳፌ ሜዴቲስ።

13 አኔ ሂንቴ ፐርዲቴ። ማጫሲ ባ ሁዔ ቃጫና ያሳ ዎሳናው ቤሲ? 14 አዴይ ባ ሁዔያ ዲቺኮ ኢያው ቦርሶ ጊዴይሳ ሃሪ አቶሺን ሜዴቴሌ ሂንቴና ታማርሴኔ? 15 ሺን ማጫሲ ባ ሁዔያ ዲቺኮ ኢው ቦንቾ ጊዴኔ? ማጫሳስ ሁዔይ ኢሜቲዳይ ኢያ ባና ካማና ሜላሳ። 16 ሺን ሃይሳ ቦላ ፓላማናው ኮያ አሲ ዴዒኮ፥ ኑስ ጊዲን ዎይኮ ያሳ ዎሳ ኬላታስ ጊዲን ሃይሳፌ ሃራ ዎጊ ባዋ።

ጎዳ ካሁዋ ኤኪያ ማራ

(ማቶ 26:26-29፤ ማር 14:22-25፤ ሉቃ 22:14-20)

17 ሂንቴ ኢሲፌ ሺቁይ ጎዳስ ጊዶናሺን ቆሆስ ጊዲያ ጊሾ ሃሲ ታ ኢሚያ ኪታን ሂንቴና ናሺኪ። 18 ታ ኮይር ሲዒዳይ፥ ሂንቴ ዎሳ ኬላን ሺቁያ ዎዴ ሂንቴ ጊዶን ሻሄቴሌ ዴዔይሳ። ሄ ታ ሲዒዳይሳፌ ባጋይ ቱማ ጊዴይሳ አማናይስ። 19 ሂንቴ ጊዶፌ ቱሚ ዴዔይሳቲ አናንቴኮ ኤሬታና ሜላ ሂንቴ ጊዶን ሻኮይ ዳናይሲ አቴና። 20 ሂንቴ ኢሲፌ ሺቁያ ዎዴ ሂንቴ ሺቁይ ጎዳ ካሁዋ ማናሳ ጊዴና። 21 ሂንቴ ካሲ ሚያ ዎዴ ኢሶይ ኢሱዋ ናጎና ባይሳ ባይሳ ሚያ ጊሾ ኢሶይ ኮሻቴስ ሃንኮይ ቃሲ ማሶቴስ። 22 ቱማ ሂንቴ ማናውኔ ኡያናው ሂንቴው ኬሲ ባዌ? ዎይኮ ያሳ ዎሳ ኬላ ካዴቲ? አይኮይ ባይና ማንቆታ ዩላዩቲ? ታ ሂንቴና ዎይጎ? ሃይሳስ ታ ሂንቴና ናሾ? ናሺኪ።

23 ታኒ ሂንቴው ኢሚዳ ቲሚርቲያ ጎዳፔ ኤካስ። ጎዳ ዩሱሲ አዲዲ ኢሜቲያ ቃማን ኡይሳ ኤኪዲ፥ 24 ያሳ ጋላቲስ። ኡይሳ ባሲዲ «ሄዒቴ፤ ሚቴ። ሃይሲ ሂንቴው ኢሜቲያ ታ አሹዋ። ሃይሳ ሚሼ ታና ሃሳዩቴ» ያጊስ። 25 ሄሳዳካ፥ ካሁዋ ሚዲ ሲሚን፥ ፁዓ ኤኪዲ፥ «ሃይሲ ፁዓይ ታ ሱላን ኤቂያ አራሳ ጫቁዋ። ሂንቴ ኢያፔ ኡያ ዎዴ ኡባን ታና ሃሳዩቴ» ያጊስ። 26 ሂንቴ ሃ ኡይሳ ሚያ ዎዴኔ ሃ ፁዓ ኡያ ዎዴ ኡባን ጎዳይ ያና ጋካናው ኢያ ሃይቁዋ አዴታ።

27 ሄሳ ጊሾ፥ ቤሶና አጊያን ጎዳ ኡይሳ ሚያ ዎይኮ ጎዳ ፁዓ ኡያ አኒካ ኢያ አሹዋኔ ሱላ ቶቺዳ ጊሾ ባ ናጋሪን አይሼቴስ። 28 ሺን አሲ ባና ፓጮ። ያቲዲ ኡይሳ ዋ፤ ፁዓፔካ ኡዮ። 29 ጎዳ አሹዋባ ሻኪ ኤርና፥ ኡይሳ ሜይኔ ፁዓፔ ኡዮይ፥ ባ ቦላ ፐርዳ ሜሲኔ ኡዮስ። 30 ሄሳ ጊሾ፥ ሂንቴ ጊዶፌ ዳርቲ ዳቡሪዶሶና፤

ሃርጊዶሶና፤ ቃሲ ኡንዴና አሳቲ ሃይቂዶሶና። 31 ሺን ኑ ኑና ፓጪ ቤዒዳባ ጊዲያኮ፣ ኑ ቦላ ፒርዴታናሺን። 32 አላሜይ ፒርዴቲያ ዎዴ ኑ አላሚያራ ፒርዴቶና ሜላ ሃዒ ጎዳይ ኑና ሴሬስ።

33 ሄሳ ጊሾ፣ ታ ኢሻቶ፣ ጎዳ ካሁዋ ማናው ሂንቴ ሺቂያ ዎዴ ኢሶይ ኢሱዋ ጋሲ ኤኪቴ። 34 ሂንቴ ሺቆይ ፒርዳስ ጊዶና ሜላ ኮሻቲዳ አኒካ ዴዒኮ፣ ባ ሶን ሞ።

አቲዳባ ታኒ ያ ባዳ ሂንቴው አዳና።

12

ጌሻ አያና ኢሞታታ

1 ታ ኢሻቶ፣ ጌሻ አያና ኢሞታታባ ሂንቴ ኤራና ሜላ ታ ኮያስ። 2 ሂንቴ ያሳ አማኖና ዎዴ ዶኒ ባይና ኤቃታን ጎሼቲዲ፣ ሂንቴ ኤሮና ሶ ቤዳይሳ ኤሬታ። 3 ያሳ አያናይ ካሌሲያ አሲ አኒካ፣ «ዩሱሲ ቃንጌቶ» ያጌና። ቃሲ ጌሻ አያናይ ካሌሶና ዴዒሺን፣ አኒካ፣ «ዩሱሲ ጎዳ» ጋናው ዳንዳያናይሳ ሂንቴ ኤራና ሜላ ኮያይስ።

4 ዱማ ዱማ አያና ኢሞታቲ ዴያሶና፣ ሺን ኢሞታታ ኢሚያ አያናይ ኢሱዋ። 5 ኑ ጎዳስ አሲያ ዱማ ዱማ አሶቲ ዴያሶና፣ ሺን ጎዳይ ኢሱዋ። 6 ኑ ጎዳስ አሲያ ዱማ ዱማ አጌቲ ዴያሶና፣ ሺን ሄ አጌታን አሳ ኡባን አሲያ ያሳይ ኢሱዋ። 7 ሺን ኢሱዋስ ኢሱዋስ ኢሜቲዳ ኢሞታታን ሃራታ ማዳና ሜላ ጌሻ አያናይ ቆንጩስ።

8 ጌሻ አያናይ ኢሱዋስ ጨንጫቴሲ ኩሚዳ ቃላ ኢሜስ፤ ቃሲ ኢሱዋስ ኤራቴሲ ኩሚዳ ቃላ ኢሜስ። 9 ሄ ጌሻ አያናይ ኢሱዋስ አማኖ፣ ሃንኩዋስ ቃሲ ፓሲያ ዎልቃ ኢሜስ። 10 ጌሻ አያናይ ኢሱዋስ ማላታ አሲያ ዎልቃ፣ ኢሱዋስ ቲንቤቴ አዲያ ዎልቃ ኢሜስ። ኢሱዋስ አያናፔ አያና ሻኪ ኤሪያ ዎልቃ፣ ኢሱዋስ ዱማ ዱማ ዶናን አዲያ ዎልቃ፣ ቃሲ ኢሱዋስ ዱማ ዱማ ዶናን አዴቲዳይሳ ቢርሺያ ዎልቃ ኢሜስ። 11 ሺን ሃ ኡባ አሴይ ሄ ኢሲ ጌሻ አያና። ኢ ኮያ ሜላ ኢሲ ኢሲ አሳስ ዱማ ዱማ ኢሞታ ኢሜስ።

አሳቴሳኒ ዱማ ዱማ ቢሊቴታ

12 ኢሲ አሳቴሳን ዳሮ ቢሊቴቲ ዴያሶና፣ ሺን ሄ ዱማ ዱማ ቢሊቴቲ ኢሲ አሳቴሲ ጊዶሶና። ሄሳዳካ፣ ኪሪስቶሲ ዱማ ዱማ ቢሊቴቲ ዴዒያ አሳቴሳ ሜላ። 13 ኑኒ አይሁዴ ጊዲን ጊሪኬ

ጊዲን አይሌ ጊዲን ምግኖ ጊዲን፤ ኡባይ ኢሲ አሳቴሲ ጊዲናው ጊሻ አያናን ግግቱቲዳ። ቃሲ ኑ ኡባይ ኢሲ ጊሻ አያና ኤኪዳ።

14 ኑ አሳቴሳን ዱማ ዱማ ቢሊቴቲ ዴዎሶናፕ አቲን ኢሲ ቢሊቴ ጊዴና። 15 ቶሆይ፤ «ታኒ ኩሼ ጊዴና ጊሾ ቢሊቴ ጊዲኬ» ጊኮ፤ ኢ ሄሳ ጊዳ ጊሾ ቢሊቴቴሳይ አቲዬ? 16 ሃይሲ፤ «ታኒ አይፌ ጊዴና ጊሾ ቢሊቴ ጊዲኬ» ጊኮ፤ ኢ ሄሳ ጊዳ ጊሾ አሳቴሳፌ ኢሲ ቢሊቴ ጊዴይሲ አቲዬ? 17 አሳቴሳ ኡባይ አይፌ ግላላ ጊዲዳኮ፤ ኑ አይቢን ሲግኔ? ቃሲ አሳቴሲ ኡባይ ሃይሳ ግላላ ጊዲዳኮ ኑ አይቢን ሲንጋኔ?

18 ሺን ያሳይ ባ ኮዩዳይሳዳ፤ አሳቴሳ ጊዴን ዱማ ዱማ ቢሊቴታ ምሲስ። 19 ኡባይ ኢሲ ቢሊቴ ጊዲዳኮ አሳቴሲ ሞኒዲ ዳኔ? 20 ሺን ቢሊቴቲ ዳሮ ጊዲኮካ፤ አሳቴሳይ ኢሶ።

21 አይፌይ ኩሼኮ፤ «ኔ ታው ኮሻካ» ጋናው ዳንዳዔና። ምይኮ ሁዔይ ቶሆኮ፤ «ኔ ታው ኮሻካ» ጋናው ዳንዳዔና። 22 ሺን ዳሱራ ዳኒያ አሳቴሳ ቢሊቴቲ ኑስ አዲዲ ኮሾሶና። 23 ቦንቾ ኮሼና ጊዲ ኑ ቆፒያ ኑ ቢሊቴታፕ ባጋታ ዳሮ ቦንቾስ። ቃሲ ኑ ቦርሴቲያ ኑ አሳቴሳ ቢሊቴታ አሲ ቦንቾዲ ናጎስ። 24 ኑ ቤዒን ቦርሶና አሳቴሳ ቢሊቴታስ ቦንቾ ኮሼና። ሺን ያሳይ ኑ አሳቴሳ ቢሊቴታ ምሊራ ጋሴሲዲ ቦርሲያ ቢሊቴታስ አዲያ ቦንቾ ኢሚስ። 25 አሳቴሳ ቢሊቴቲ ኢሶይ ኢሱሞራ ሻኮ ሜዶና ምሊስ ቆፓና ሜላ አሲዲ ሜዲስ። 26 አሳቴሳ ቢሊቴታፕ ኢሶይ ሳኬቲኮ ቢሊቴቲ ኡባይ ኢያራ ሳኬቶሶና። አሳቴሳ ቢሊቴታፕ ኢሶይ ቦንቾቲኮ ቢሊቴቲ ኡባይ ኢያራ ኡፋይቶሶና።

27 ሂንቴ ኡባይ ኪሪስቶሳ አሳቴሲ፤ ቃሲ ሂንቴ ኢሶይ ኢሶይ ኢያ ቢሊቴታ። 28 ምሳ ኬሳን ያሳይ፤ ኮይሮ ሃሞሬታ፤ ናምዳንሶ ናቤታ፤ ሄቫንሶ አስታማሬታ፤ ካሊዲ ማላታ አሴይሳታ፤ ፓሴይሳታ፤ ሃራታ ማዴይሳታ፤ ምሳ ኬሳ አይሴይሳታ፤ ዱማ ዱማ ዶናን ሃሳዬይሳታ ምሲስ።

29 ኡባይ ሃሞሬ? ኡባይ ናቤ? ኡባይ አስታማሬ? ኡባይ ማላታ አሲ? 30 ኡባይ ፓሲዬ? ኡባይ ዱማ ዱማ ዶናን አይቴ? ኡባይ ዱማ ዱማ ዶናን አዴቶይሳ ቢርሺ? 31 ሺን ኡባፌ አዲያ ኢሞታ ሚንሲዲ ኮዩቱ።

ቃሲ ኡባፌ አዲያ አጊያ ታ ሂንቴና ቤሳና።

1 ታኒ አሳ ቃላኔ ኪታንቾ ቃላ አዴታናው ዳንዳዒኮካ፥ ታው ሲቆይ ዳዩኮ፥ ጮ ጊሪያ ዳላ ሜላ። 2 ቲንቢቴ ኦዲያ ኢሞይ ታው ዴዒኮካ፥ ፀራ ኡባ ኤሪኮካ፥ ኤራቴሲ ኡባይ ዴዒኮካ፥ ቃሲ ዴሪያ ዴንሲዲ ሃራሶ ኤፊያ አማኖይ ታው ዴዒኮካ፥ ሲቆይ ዳዩኮ፥ ታ አይኮካ ጊዲኬ። 3 ታው ዴዒያባ ኡባ ማንቆታስ ኢሚኮካ፥ ሃሪ አቶሺን፥ ታና ታማስ አሳ ኢሚኮካ፥ ሲቆይ ዳዩኮ ታና አይኮካ ማዴና።

4 ሲቆይ ዳንዳዒንቾ፥ ሲቆይ ኬሃ፥ ሲቆይ ቃናቴና፥ ሲቆይ ጩቁቴና፥ ሲቆይ አቶሬና። 5 ሲቆይ ቤሶናባ አሴና፥ ሲቆይ ኡዜቴና፥ ሲቆይ ዩሎቴና፥ ሲቆይ ባ ቆሆ ፓይዴና። 6 ሲቆይ ቱማን ኡፋይቴሲ፤ አቲን ዎርዶን ኡፋይቴና። 7 ሲቆይ ኡባ ዳንዳዒስ፤ ኡባ አማኔስ፤ ሎዎባይ ሃናና ጊዲ፥ ኡፋይሳን ናኔስ፤ ኡባ ኔንጩስ።

8 ሲቆይ ዉርሴሲ ጋካናው ዳዩና፥ ሺን ቲንቢቴይ አታና፤ ዳማ ዳማ ዶናን ኦዴቴይሲ አታና፤ ኤራቴሲካ አዳና። 9 ኑ ኤራቴሳፌ ጉሲ ኤሮስ፤ ቲንቢቴያ፤ ባጋ አዶስ። 10 ሺን ፖሎ ጊዲዳይሲ ያ ዎዴ ፖሎ ጊዶናይሲ አታና።

11 ታኒ ናዓ ዴዒያ ዎዴ ናዓዳ ሃሳይስ፤ ናዓዳ ቆፓይስ፤ ናዓዳ አኬካይስ፥ ታ ካሃሚዳ ዎዴ ናዓቴሳ ሃኑዋ አጋስ። 12 ሃዒ ፖዶይ ባይናሶን ማስቶቴን ቤዔይሳዳ ቤዎስ፥ ሺን ሄ ዎዴ ኑ ቆንጩን ቤዓና፥ ሃዒ ኑ ኤራቴሳፌ ጉሳ ኤሮስ፥ ሺን ሄ ዎዴ ያሳይ ኑና ኤሬይሳዳ ፖሎ ኤራና።

13 ሂዛ፥ አማኖይ፥ ኡፋይሲኔ ሲቆይ፥ ሃ ሄቫቲ ኤቂዲ ዳና፥ ሺን ሃይሳታ፤ አዴይ ሲቆ።

14

ቲንቢቴኔ ዳማ ዳማ ዶና

1 ሲቆ ካሊቴ። አያና ኢሞታታ ሚንሲዲ ኮዩቴ፤ ኡባፌ አሲዲ፥ ቲንቢቴ ኢሞታ ሚንሲዲ ኮዩቴ። 2 ዳማ ዳማ ዶናን ኦዴቴያ አሲ ያሳስ ኦዴሲ፤ አቲን አሳስ ኦዴና። ሺን አሳስ ቆንጩቦና ፀራ አያና ዎልቃን ኦዴቴያ ጊሾ አኒካ ኢ ኦዴቴይሳ አኬኬና። 3 ሺን ቲንቢቴ ኦዴይሳቲ አሴ ዲቻናው፥ ሚንሴሳናዉኔ ሚንሳናው አሳስ ኦዴስ። 4 ዳማ ዳማ ዶናን ኦዴያ አሲ ባና ዲቼስ። ሺን ቲንቢቴ ኦዴያ አሲ ዎሳ ኬሳ ዲቼስ።

5 ሂንቴ ኡባይ ዳማ ዳማ ዶናን ኦዴቴያኮ ታ ዶሳይስ፥ ሺን ቲንቢቴ ኦዳናይሳ አሳዳ ዶሳይስ። ዳማ ዳማ ዶናን ኦዴቴይሳ ዎሳ

13:2 ማቶ 17:20፤ 21:21፤ ማር 11:23

ኪሲ ዲቻናው ቢርሺያ አሲ ዳዩኮ፣ ዱማ ዱማ ዶና አዴቴያሳፌ ቲንቢቴ አዴይሲ አዴስ።

6 ሺን ታ ኢሻቶ፣ ታኒ ሂንቴኮ ባዳ ቆንጩሳን ዎይኮ ኤራቴሳን ዎይኮ ቲንቢቴ አዴን ዎይኮ ቲጣርቴን ጊዶናሺን ዱማ ዱማ ዶናን አዴቴኮ ሂንቴና አይ ማዳኔ? 7 ዱማ ዱማ ዮሳ ሚሺታስ ኢሲ ቆሞ ጊርሲ ዴዲኮ፣ ሱሱልዔ ጊርሲኔ ዲሳ ጊርሲ ዋቴዲ ሻኪ ኤራኔ? 8 ቃሲ ሞይዜ ፑኖይ ጌዩዲ ኤሬቶና ኢዲኮ አሳስ ጊጌቴይ አኔ? 9 ሄሳዳካ፣ ዱማ ዱማ ዶናን ሂንቴ አዴቴይሲ ቆንጩ ጊዶና ኢዲኮ ሂንቴ አዴይሳ አኔ ኤራኔ? ሄሲ ጫርኮስ አዲያ ሚላ።

10 ሃ አላሚያን ዳሮ ዶናቴ ዴዎሶና፤ ሄ ኡባስ ቢርሺሴ ዴዔስ። 11 ሺን ኢሲ አሲ አዴቴያ ዶና ታኒ ኤሮና ኢዲኮ ኢ ታው ኢማሴ ጊዴስ፤ ታካ ኢያው ኢማሴ ጊዳይስ። 12 ሄሳዳካ፣ ጌሻ አያና ኢሞታ ሂንቴ ኤካናው ሚንሲዲ ኮይኮ፣ ዎሳ ኪሲ ዲቻናው ኡባፌ አዲያ ኢሞታ ኮይቴ።

13 ዱማ ዱማ ዶናን አዴቴያ አሲ ባ አዳ ቢርሻናው ቢርሺሳ ኢሞታይ ኢሚታና ሚላ ዎሳ ዎሶ። 14 ታኒ ዱማ ዱማ ዶናን ዎሳ ዎሲኮ፣ ታ አያናይ ዎሴስ፣ ሺን ታ ዎዛናይ አይኮካ ጎዔቴና። 15 ያቲን፣ ታ አይ አሳናው ኮሺ? ታኒ ታ አያናን ዎሳይስ፤ ታ ዎዛናካ ዎሳይስ። ታኒ ታ አያናን ዮፃይስ፤ ታ ዎዛናካ ዮፃይስ። 16 ሄሳ ጊዶና ኢዲኮ ኔኒ ኔ አያናን ዎሳ ጋላቲያ ዎዴ ሄ ቤሳን ኔኒ ጌሪሳ ኤሮና አሲ ኔ ጋላቴይሳ ዎይጊዲ፣ «አሚንዲ» ጋኔ? 17 ኔኒ ዎሳ ጋላቴይሲ ሎዎ፣ ሺን ሃራ አሲ ማዴና።

18 ታ ሂንቴ ኡባፌ አሳዳ ዱማ ዱማ ዶናን አዴቴያ ጊሾ ዎሳ ጋላታይስ። 19 ሺን ታኒ ዎሳ ኪሳን ሃራታ ታማርሳናው ዱማ ዱማ ዶናን ታሙ ሙኩሉ ቃላ አዴታናፕ ኤሬቴያ ዶናን ኢቻሹ ቃላ አዴታናው ዶሳይስ።

20 ታ ኢሻቶ፣ ሂንቴ ቆፋን ናይታዳ ሃኖፒቴ። ሂንቴ ኢታባስ ናይታዳ ሃኒቴፕ አቲን ሂንቴ ቆፋን ካሃማታ ጊዲቴ። 21 ጎዳይ፣ ጌሻ ማፃፋን፣

«ታኒ ሃ አሳስ፣
ዱማ ዱማ ዶናን አዴቴያ አሳኒኔ
ኢማሳ ኢንፃርሳን አዴቴያ አሳን አዳና።
ሺን ሄሲ ሃኒኒካ ታና ሲዎኮና» ያጌስ።

22 ሂዛ፣ ዱማ ዱማ ዶናን ሃሳዮይ፣ አማኖና አሳስ ማላ ጊዴሲፕ አቲን አማኒያ አሳሳ ጊዴና። ቲንቢቴይ አማኒያ አሳስ ማላ ጊዴሲፕ አቲን አማኖና አሳሳ ጊዴና።

23 ዎሳ ኪሳ አሳይ ኢሲፌ ሺቂያ ዎዴ ኡባይ ዱማ ዱማ ዶናን አዴቴኮ ኤሮና ዎይኮ አማኖና አሳይ ሂንቴ ሺቁዎ ዩዲ፣ «ሃይሳቴ

ጎሮሶና» ጎኮናዬ? ²⁴ ሺን ኤርና ዎይኮ አማኖና አሳይ ዎሳ ኬሲ ያ ዎዴ አሳይ ቲንቢቲ ኦዲሺን፣ ሲዲኮ ባ ናጋራ አኬካና፤ ቃሲ ኢ ሲዲዳ ቃላን ፐርዴታና። ²⁵ ኤንቲ ኢያ ዎዛናን ጌሚዳ ቆፋ ቆንጩሳና። ሄሳዳካ፣ «ቱማ ዎሳይ ሂንቴ ጊዶን ዴዔስ» ያጊዲ ማርካቲዲ፣ ጉፋኒዲ ዎሳስ ጎይናና።

ጎይኖ ማራ

²⁶ ታ ኢሻቶ፣ ኑ ዎይጊኖ? ሂንቴ ኢሲፌ ሺቂያ ዎዴ ኢሱዋስ ማዘሙሬይ ዴዔስ፤ ኢሱዋስ ታማርሶ ኢሞቲ ዴዔስ፤ ኢሱዋስ ቆንጩሲ ዴዔስ፤ ኢሱዋስ ዱማ ዱማ ዶናን ሃሳዮይ ዴዔስ፤ ኢሱዋስ ቢርሺላ ኢሞቲ ዴዔስ። ሄ ኡባይ ዎሳ ኬሲ ዲቺያባ ጊዳናው ቤሴስ። ²⁷ ዱማ ዱማ ዶናን ኦዴቲያ አሳቲ ዴዔኮ፣ ናምዓ ዎይኮ ዳሪኮ ሄኻ ጊዲዲ ማራን ማራን ሃሳያናው ቤሴስ። ኤንቲ ኦዴቲይሳ ሃራ አሲ ቢርሾ። ²⁸ ሺን ቢርሺያ አሲ ዳዩኮ፣ ዱማ ዱማ ዶናን ኦዴቲይሲ ዎሳ ኬላን ሲዲ ጎ። ባወኔ ባ ዎሳስ ኦዶ።

²⁹ ቲንቢቲ ኦዴይሳቲ ናምዓ ዎይኮ ሄኻ ጊዲዲ ኦዶ። ቃሲ ሃራቲ ኤንቲ ጊያባ ፐርዶና። ³⁰ ሄ ሺቁዋን ዴዲያ ሃራ አሳስ ኢሲባይ ቆንጩኮ ካሴ ኦዴቲይሲ ሲዲ ጎ። ³¹ ኡባይ ታማራና ሜላኔ ኡባይ ሚናና ሜላ ማራን ማራን ቲንቢቲ ኦዳናው ዳንዳዔታ። ³² ናቤታ አያናይ ናቤታስ ኪቴቲስ። ³³ ጌሻታ ዎሳ ኬላ ኡባይ ሜዜቲዳይሳዳ ዎሳይ ሳርቴላ ዎሳፌ አቲን ጫቦ ዎሲ ጊዴና።

³⁴ ማጫሲ ዎሳ ኬላን ሲዲ ጎ። ሙሴ ሂጌይ ጌይሳዳ ኤንቲ ሃራቶፌ አቲን ዎሳ ኬላን ኦዳናው ኤንታው ማቲ ባዋ። ³⁵ ማጫሲ ዎሳ ኬላን ሃሳዮይ ቦርሶ ጊዲያ ጊሾ ኢሲባ ኤራናው ኮይኮ ሶን ባንታ አዘናታ አይቾና።

³⁶ ዎሳ ቃላ ኮይሮ ሂንቴ ኤሂዴቲ? ዎይኮ ዎሳ ቃላይ ሂንቴ ሃላላኮ ዩዴ? ³⁷ አኒካ ባና ናቤ ዎይኮ ባና ዎሳ አሲ ጊዲ ቆፒኮ፣ ታኒ ሂንቴው ሃፌይሲ ጎዳ ኪታ ጊዴይሳ አኬኮ። ³⁸ ሺን አኒካ አኬኮና ኢዲኮ ኢካ አኬኮቶፎ።

³⁹ ሄሳ ጊሾ፣ ታ ኢሻቶ፣ ቲንቢቲ ኦዳናው ሚንሲዲ አሞቲቲ፤ ቃሲ ዱማ ዱማ ዶናን ኦዴቲይሳካ ዲጎፊቲ። ⁴⁰ ሺን ኡባይካ ዎጋኒኔ ማራን ጊዶ።

15

ኪሪስቶሳ ሃይቆፔ ዴንዱዋ

¹ ታ ኢሻቶ፣ ታ ሂንቴው ማርካቲዳ ዎንጊላ ሂንቴ ኤኪዳይሳኔ ሂንቴ አማኖይ ኢያን ኤቂዳይሳ ሂንቴ አኬካና ሜላ ኮያይስ። ² ታ

ታማርሲዳ ዎንጌላ ሚንሲዲ አይኪኮ ሂንቴ ኢያን አታና። ሄሲ ሃናና ኢጊኮ ሂንቴ አማናአይ ሃዳ ጊዳና።

3 ታኒ ኤኪዳ ኡባፌ አዲያ ኪታ ካሴታዳ ሂንቴው ኢማስ። ሄሲካ፣ ጊሻ ማፃፋይ ጌይሳዳ፣ ኪሪስቶሲ ኑ ናጋራ ጊሻ ሃይቂስ።

4 ሞጌቲስ፤ ጊሻ ማፃፋይ ጌይሳዳ፣ ሄቫንሶ ጋላሳን ሃይቆፕ ዴንዲስ። 5 ጴጊሮሳስ ቆንጨስ። ሄሳፌ ጉዬ፣ ታማኔ ናምዑ ሃዋሬታስ ቆንጨስ። 6 ሄሳፌ ጉዬ፣ ኢቻሹ ጌታፕ ዳሪያ አሳስ ኢሲ ቶሆ ቆንጨስ። ኤንታፌ ዳሪያ ባጋይ ሃፒ ጋካናው ፓፃ ዴዎሶና ሺን ጉሳቲ ሃይቂዶሶና። 7 ሄሳፌ ጉዬ፣ ያይቆባስ ቆንጨስ፤ ጉዬፕ ባ ሃዋሬታ ኡባስ ቆንጨስ።

8 ቃሲ ዉርሴሳን አዉጫያ ሜላ ጊዲዳ ታው ቆንጨስ። 9 ታኒ ዩሱሳ ሃዋሬታ ኡባፌ ላፋ። ታኒ ዎሳ ዎሳ ኬሳ ጎዲዳ ጊሻ ዩሱሳ ሃዋሬ ጌቲታዳ ጌጌታናው ቤሶናይሳ። 10 ሺን ዎሳ አዶ ኬሃቴሳን ታ ሃፒ ጊዲዳይሳ ጊዳስ፤ ኢ ታው ኢሚዳ አዶ ኬሃቴሳይ ሜላ አቲቤና። ታኒ ሃንኮ ሃዋሬታፕ አሳዳ ዳቡራስ። ሺን ታራ ዴፒያ ዎሳ አዶ ኬሃቴሳይ አሲስፕ አቲን ታና ጊዲኬ። 11 ሂዛ፣ ታና ጊዲን ኤንቲ፣ ኑ ኡባይ ታማርሴይ ሄሳ፤ ሂንቴካ ሄ ኪታ አማኒዴታ።

ሃቆፕ ዴንዶ

12 ኪሪስቶሲ ሃይቆፕ ዴንዲዳይሳ ኑ ሳባኪያ ዎዴ ሂንቴፌ ኢሶቲ ኢሶቲ ያቲን፣ ዎይጊዲ፣ «ሃይቆፕ ዴንዶይ ባዎ» ያጎና?

13 ሃይቆፕ ዴንዶይ ባይናባ ጊዲኮ ኪሪስቶሲ ሃይቆፕ ዴንዲቤና ጉሱ። 14 ኪሪስቶሲ ሃይቆፕ ዴንዲቦናባ ጊዲኮ ኑ ቲሚርቲይ ቃሲ ሂንቴ አማኖይካ ሃዳ። 15 ሃይቆፕ ዴንዶይ ባይናሺን፣ ኑኒ ዎሳይ፣ «ኪሪስቶሳ ሃይቆፕ ዴንሲስ» ያጊዲ ሳባኪሼ ዎሳ ዎርዳንቾ ማርካታ ጊዲዳ ጉሱ። 16 ሃይቂዳ አሳይ ሃይቆፕ ዴንዲቦናባ ጊዲኮ ሂዛ፣ ኪሪስቶሲ ሃይቆፕ ዴንዲቤና። 17 ኪሪስቶሲ ሃይቆፕ ዴንዶናባ ጊዲኮ፣ ሂንቴ አማኖይ ሃዳ፤ ቃሲ ሂንቴ ሃፒ ጋካናው ሂንቴ ናጋራን ዴፔታ። 18 ሂዛ፣ ኪሪስቶሳ አማኒዲ ሃይቂዳይሳቲካ ዳዩዶሶና ጉሱ። 19 ኑኒ ሃ አላሚያ ዴዑዎ ፃላሳስ ኪሪስቶሳን ኡፋይሲ አሲዳባ ጊዲኮ፣ ሃ ሳፃን ዴፒያ አሳ ኡባፌ ኑባይ አዲዳ ዩባታ።

20 ሺን ኪሪስቶሲ ሃይቂዳይሳታስ ሃይቆፕ ዴንዶን ባይራ ጊዲዲ ቱማ ዴንዲስ። 21 ሃይቆይ ኢሲ አሳ ባጋራ ሃ አላሚያ ዩዳይሳዳ ሃይቆፕ ዴንዶይ ኢሲ አሳ ባጋራ ዩስ። 22 አዳሜ ባጋራ አሳ

15:3 ኢሳ 53:5-12 15:4 ማዝ 16:8-10፤ ማቶ 12:40፤ ሃ.አ 2:24-32 15:5 ማቶ 28:16-17፤ ማር 16:14፤ ሉቃ 24:34፤ 36፤ ዮሃ 20:19 15:8 ሃ.አ 9:3-6 15:9 ሃ.አ 8:3

ኡባይ ሃይቂዳይሳዳ ኪሪስቶሳ ባጋራ አሳ ኡባይ ዴዎን ዳና። 23 ሺን ኢሶይ ኢሶይ ባ ማራን ማራን ዴንዳና። ኪሪስቶሲ ኡባሬ ካሴቲዲ ዴንዲስ፤ ሄሳፌ ጉዩ፥ ኪሪስቶሳይሳቲ ኢ ያ ዎዴ ዴንዳና።

24 ሄሳፌ ጉዩ፥ ኪሪስቶሲ ሃሬይሳ፥ ማታኔ ዎልቃ ኡባ ጳይሲዲ፥ ካዎቴሳ ያሳ አዋስ ኢሚያ ዎዴ ዎዲያ ዉርሴሳይ ያና።

25 ያሳይ ኢያ ሞርኬታ ኡባ ኢያ ቶሁዋፕ ጋርሳን ዎሳና ጋካናው ኪሪስቶሲ ሃራናው ቤሴስ። 26 ዉርሴሳን ኢ ጳይሳናው ዴዲያ ሞርኬይ ሃይቆ። 27 ጌሻ ማፃፋን፥ «ያሳይ ኡባባ ኢያ ማታፕ ጋርሳን ሃሪሲስ» ጌቴቲዲ ፃፌቲስ። ሺን ኡባ ኢያ ማታፕ ጋርሳን ሃሪሲስ ጌይሲ፥ ኡባባ ኢያ ማታፕ ጋርሳን ሃሪሲዳ ያሳ ጉጂና።

28 ኡባባይ ኪሪስቶሳ ማታፕ ጋርሳን ሃሬቲዳፕ ጉዩ ኪሪስቶሲ ቃሲ ባ ሁዔን ኡባባ ባው ሃሪሲዳ ያሳስ ሃሬታና። ሄ ዎዴ ያሳይ ባ ፃላላ ኡባ ሃራና።

29 ሃይቂዳይሳቲ ዴንዶናባ ጊዲኮ ኤንታ ጊሾ አሳስ አይቢ ዎዴይ ዴዲ? ሃይቂዳይሳቲ ዴንዶናባ ጊዲኮ ያቲን፥ አይስ፥ አሳይ ሃይቂዳይሳታ ጊሾ ፃማቆቶና?

30 ያቲን፥ ኑኒ አይስ ኡባ ዎዴ ኑናቴሳ ሜቶስ አሲ ኢሞና?

31 ታ ኢሻቶ፥ ታ ጋላስ ጋላስ ሃይቆስ አዳዳ ኢሜታይስ። ሄሲካ፥ ጎዳ ኪሪስቶስ ዩሱሳን ዴዲያ ዴዑዋ ኢሲሬቴሳን ሂንቴናን ጩቂያ ጊሾሳ። 32 አሳ ቆፋሶ ጊዲኮ፥ ታኒ ኤፌሶናን ዶዓራ ቡቴቲዳይሲ ታና አይ ማዲ? ሃይቂዳይሳቲ ሃይቆፕ ዴንዶናባ ጊዲኮ፥ «ዎንቶ ኑ ሃይቂያ ጊሾ ሃቺ ማና ኡያና» ያጊያ አሳ ሜላ ጊዶስ።

33 ጪሜቶሬቴ! ኢታ ላጌቴሲ ሎዎ አማሊያ ኢሴስ። 34 ሂንቴ አኬካኮ ሲሚቴ። ናጋራ አሶሬቴ። ሂንቴፌ ኢሲ ኢሲ አሳይ ያሳ ኤርኮና። ታኒ ሂንቴና ዩላያናው ሄሳ ጋይስ።

ዴንዶ አሳቴሲ

35 ኢሲ አሲ፥ «ሃይቂዳ አሳይ ዋኒዲ ዴንዳኔ? ኤንቲ አይ ሜላ አሳቴሳራ ያኔ?» ያጎና አጊና። 36 ኔኖ ኤያው፥ ኔኒ ቢታን ዜሪያ ዜሬሳይ ሃይቆና ዶሌና። 37 ኔኒ ዜሬይ ጊስቴ ጊዲን ዎይኮ ሃራ ካሳ ቆሞ አይፌ ፃላላ ዜራሳፕ አቲን ዶሊዳ ዶላ ጊዴና። 38 ሺን ያሳይ ዜሬሳስ ባ ዶሊዳ ሜላ ሜዴቴሲ ኢሜስ። ዱማ ዱማ ዜሬሳስ ዱማ ዱማ አሳቴሲ ኢሜስ። 39 ሜዴቴሳ ኡባ አሾይ ኢሶ ጊዴና። ሺን አሳ አሾይ ኢሱዋ፤ ሜሄ አሾይ ዱማ፤ ካሬታ አሾይ ዱማ፤ ቃሲ ሞሎ አሾይ ዱማ።

40 ሳሎ አሳቴሲ ዴዔስ፤ ቃሲ ሳዓ አሳቴሲ ዴዔስ። ሺን ሳሎ አሳቴሳ ቦንቾይ ዱማ፤ ቃሲ ሳዓ አሳቴሳ ቦንቾይ ዱማ። 41 አዎ

ቦንቾይ ዱማ፤ አጌና ቦንቾይ ዱማ፤ ያሊንቶታ ቦንቾይ ዱማ፤ ኢሲ ያሊንቶይ ሃንኮ ያሊንቱዋፌ ቦንቾን ዱማቴስ።

42 ሃይቂዳይሳቲ ሃይቆፔ ዴንዲያ ዎዴ ሄሳዳ ሃናና። ሃይቂያ አሳቴሳይ ዜሬቴስ፤ ሃይቆና አሳቴሲ ጊዲዲ ዴንዴስ። 43 ቶሼን ዜሬቴዲ፣ ቦንቾን ዴንዳና፤ ዳቡራን ዜሬቴዲ፣ ዎልቃን ዴንዳና። 44 ሜዴቴሳ አሳቴሳይ ዜሬቴዲ፣ አያና አሳቴሲ ጊዲዲ ዴንዳና። ሜዴታ አሳቴሲ ዴዲኮ፣ አያና አሳቴሲ * ዴዲስ።

45 ሄሳዳካ፣ ጌሻ ማፃፋን፣ «ኮይሮ አዴይ፣ አዳሜይ፣ ፓፃ ዴዲያ አሴ ጊዲዲ ሜዴቴስ» ያጌስ። ሺን ዉርሴሳ አዳሜይ፣ ኪሪስቶሲ፣ ዴዎ ኢሚያ አያና ጊዲስ። 46 ሺን ሜዴታ አሲ ኮይሮ ዩን፣ ጉዩፔ አያና አሲ ዩሲፔ አቲን አያና አሲ ኮይሮ ዩቤና። 47 ኮይሮ አዳሜይ ቢታፌ ሜዴቴዳ ቢታ አሲ፤ ናፖሞንሶ አዳሜይ ሳሎፔ ዩዳ ሳሎ አሲ። 48 ቢታፌ ሜዴቴዳይሳቲ ቢታፌ ሜዴቴዳይሳ ዳኖሶና። ሳሎይሳቲ ሳሎፔ ዩዳይሳ ዳኖሶና። 49 ኑኒ ቢታፌ ሜዴቴዳ አዲያ ዳኒይሳ ሜላ ሳሎፔ ዩዳ አዲያ ዳናና።

50 ታ ኢሻቶ፣ ታ ጌይሲ ሄሳ፤ ሃዲ ኑ ማዲዳ አሳቴሳይ ያሳ ካዎቴሳ ሳታናው ዳንዳዴና። ዎቂያ አሳቴሳይ ዎቆና አሳቴሳ ሳቴና።

51 ታ ሂንቴው ኢሲ ፀራ አዳና። ኑ ኡባይ ሃይቆኮ፣ ሺን ዉርሴሳን ኡባይ ላሜታና። 52 ዋይዜይ ፑኔቲያ ዎዴ አይፌይ ቂጲ ጸላናው ሃሳዮና ላሜታና። ሃይቂዳ አሳይ ዎቆና አሲ ጊዲዲ ዴንዳና፤ ኑካ ላሜታና። 53 ሃይሲ ዎቂይሲ ዎቆናይሳ፣ ሃይሲ ሃይቂይሲ ሃይቆናይሳ ማዳናው ቤሴስ።

54 ሃይሲ ዎቂይሲ ዎቆናይሳ፣ ቃሲ ሃይሲ ሃይቂይሲ ሃይቆናይሳ ማዲያ ዎዴ ጌሻ ማፃፋን፣ «ሃይቆይ ያኖን ሚቴቲስ» ጊያ ቃላይ ፖሌታና። 55 ሄሳዳካ፣

«ሃይቆ፣ ኔ ያኖይ አዉን ዴዲ?
ሃይቆ፣ ኔ ቆሂያ ዎልቃይ አዉን ዴዲ?»
ጊዳ ቃላይ ፖሌታና። 56 ሃይቆይ ዱኪያ ዎልቃይ ናጋራ፤ ቃሲ ናጋራ ዎልቃይ ሂጌ። 57 ሺን ኑ ኅዳ ዩሱስ ኪሪስቶሳ ባጋራ ኑስ ያኖ ኢሚያ ያሳ ጋላቲ ጋኮ።

58 ሄሳ ጊሾ፣ ታ ሲቆ ኢሻቶ፣ ቃያና ሚኒዲ ኤቂቴ። ኅዳ አሱዋን ሂንቴ ዳቡራይሲ ሮፕ ጊዶናይሳ ኤሪዲ ኡባ ዎዴ ኅዳ አሱዋ አዛሎና አሲቴ።

* 15:44 አያና አሳቴሲ: ጌሻ አያናይ ሃሪዳ ዎይኮ ጌሻ አያናይ ዴዎ ኢሚያ አሳቴሲ ጉሱ። 15:45 ሜዴ 2:7 15:52 1ቴሴ 4:15-17 15:54 ኢሳ 25:8 15:55 ሆሴ 13:14

16

አማኒያ አሳስ ሺቂዳ ማዱዋ

1 አማኒያ አሳስ ሚሼ ሺሾባ ጋላቲያ ዎሳ ኬሳታስ ታኒ ኪቲዳይሳዳ ሂንቴካ አሲቴ። 2 ሚሹያ ሺሾይ ታ ሂንቴኮ ቢያ ዎዴ ጊዶና ሜላ ኢሶይ ኢሶይ ሳሚንታፌ ኮይሮ ጋላስ፣ ዎጋ ዎዴ ዎጋ ዎዴ ባ ዴሜይሳፌ ኬሲዲ ባ ሶን ዳጋዮ። 3 ታኒ ያ ቢዳ ዎዴ ሚሹያ ዩሩሳላሚ ጋላና ሜላ ሂንቴ ዶሪያ አሳስ ዳብዳቤ ኢማዳ ኤንታ ዩሩሳላሚ ኪታና። 4 ኤንታራ ታ ቡሳይ ኮሺያባ ጊዲኮ ኤንቲ ታራ ባናው ዳንዳዎሶና።

ጳውሎሳ ቆፋ

5 ታኒ ማቁዶኒያራ አዳናው ቆፒዳ ጊሾ ያ ባዳ ሂንቴኮ ያና። 6 ታ ቢያሶ አው ጊዲኮካ፣ ታ ቡሳን ሂንቴ ታና ማዳና ሜላ ሂንቴ ማታን ጉሳ ዎዴ ጋምዶና አጊኬ። ባልጎ አጊናና ሂንቴ ማታን አሶና ዋያ አጋና። 7 ታኒ ኦጌራ አዳሼ ሂንቴና ቤዓናው ኮዬኬ። ጎዳይ ጊኮ፣ ሂንቴ ማታን ጉሳ ዎዴ ታካናው ቆፓይስ። 8 ሺን ታኒ ጳንዲቆስዔ ባሌይ ጋካናው ኤፌሶናን ጋምዳና። 9 ታው አሶይ ኩሚዳ ዳልጋ ፔንጌይ ዶዩቲስ፣ ሺን ዳሮ ኤቁቲያ ሞርኬቲ ዴዎሶና። 10 ኢ ታ ሜላ ጎዳ አሶ አሲያ አሲ ጊዲያ ጊሾ ዒሞቲዮሲ ሂንቴኮ ቢኮ፣ ሂንቴ ማታን ኢ ሂርጎና ዳና ሜላ አሲቴ። 11 አኒካ ኢያ ካዶፖ። ኢ ታኮ ሳሮ ሲማና ሜላ ኢያ ማዲዲ ሞይዚቴ። ታኒ ኢ ሃንኮ አማኒይሳታራ ሲማናይሳ ናጋይስ። 12 ኑ ኢሻ አጲሎሲ ሃንኮ አማኒይሳታራ ሂንቴኮ ባና ሜላ ታ ኢያ ሚንሳ ዎሳስ። ሃሲ ሂንቴኮ ባናው ኮዩቤና፣ ሺን ኢያው ኢንጄቲያ ዎዴ ሂንቴኮ ባና።

ዉርሴሳ ዞሬኔ ሳሮሶ

13 ባርኪቴ፤ አማኖን ኤቁቴ፤ ፃሊቴ፤ ሚኒቴ። 14 አሶ ኡባ ሲቆን አሲቴ። 15 ታ ኢሻቶ፣ ኢስዒፋኖሴይኔ ኢያ ሶ አሳይ አካያን ኤንቲ ኮይሮ አማኒዳይሳታ ጊዴይሳኔ አማኒይሳታ ማዳናው ባንታና አሲ ኢሚዳይሳ ሂንቴ ኤሬታ። 16 ሂንቴካ ኤንታ ሜላ አሳሲኔ፣ ኤንታራ አሶን ዳቡሪያ ኡባስ ኪቴታና ሜላ ታ ሂንቴና ዎሳይስ። 17 ኢስዒፋኖሴይ፣ ፎርቹናሲኔ አካይቆሲ ታኮ ዩዳይሲ ታና ኡፋይሲስ። ሂንቴ ባይና ቤሳን ኤንቲ ሂንቴና ጊዲዲ ታ

16:1 ሮሜ 15:25-26 16:5 ሃ.አ 19:21 16:9 ሌዌ 23:15-21፤ ዛሬ
 16:9-11፤ ሃ.አ 19:8-10 16:10 1ቆሮ 4:17 16:15 1ቆሮ 1:16

ፓጫ ኩንሲዶሶና። 18 ኤንቲ ሂንቴና ኡፋይሲዳይሳዳ ታናካ ኡፋይሲዶሶና። ሄሳ ሜላ አሳታ ዶጎፒቴ።

19 ኢሲያ ዎሳ ኬላ አሳይ ሂንቴና ሳሮ ጎሶና። አቂሊኔ ጲሪስቂላ ባንታ ሶን ሺቂያ ዎሳ ኬላ አሳራ ኢሲፌ ሂንቴና ጎዳ ሱንሳን ዎዛናፔ ሳሮሶሶና። 20 አማኒያ ኢሻቲ ኡባይ ሂንቴና ሳሮ ያጎሶና።

ጌሻ ዩሬቴሲ ዩሬቲሼ ኢሶይ ኢሱዋ ሳሮሲቴ። 21 ታኒ፥ ጳጤሎሲ፥ ሃ ሳሮሱዋ ታ ኩሼን ፃፋስ።

22 ጎዳ ዶሶና አሲ ዴዒኮ፥ ቃንጌቲዳይሳ ጊዶ። ኑ ጎዳው፥ ሃያ!

23 ጎዳ ዩሱስ ኪሪስቶሳ አዶ ኬሃቴሳይ ሂንቴራ ጊዶ።

24 ታ ሲቆይ ኪሪስቶስ ዩሱሳን ዴዒያ ሂንቴ ኡባራ ጊዶ። አሚንዒ።

አራሳ ጫቁዋ ጎፋሳ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
